

黃平縣志

十三

地360.177

41

部2:13



黃平縣志卷十五

人物志下

勇烈

忠義

勇烈

勇為三達德之一聖門中惟子路足以當之故卒死於衛太子之難後惟孟子以大勇自居故至大至剛之氣足以塞於天地州地逼處苗夷兵刃時聞不有勇烈何以立城顧或謂血氣邁往之流幸而克敵止戈以武自豪不幸而膏塗原野人莫之望烏知聖賢之道義然而成仁取義豈淺見寡聞及薄情瀆性者所能僥幸惟造詣有淺深遭逢有險夷之微有不同耳黃平自建城來七百年中其奏膚功而沒王事者豈可勝道惟舉所知所聞者列於編抑又九泉勇烈君子之幸

黃平縣志

卷十五

勇烈

不幸耳增

按舊志有忠孝而無勇烈至所列忠者悉死節殉難之士蓋吾國之所謂忠者對於朝廷對於地方原無區分况州地為國中之一黑子自州牧都守以至士兵所盡職者又滄海之一粟忠與不忠本難表見必至殺身成仁乃得享此令名豈不悲乎獨是忠不僅於殺身而士之忠者又不免囿於地土拘於職分曷若留之以待國史及他位高名赫之士故謹將盡孝各公剔出而另成為孝友一目惟更補以陷陣衝鋒奮身殺賊諸士俾後此之赳赳桓桓者知保衛地方之不為虛勞庶猛鷲有力者肯為梓桑盡職不僅喚起國魂救此弱腕不堪之中華危國也且烈固未嘗無忠而忠且未必盡烈故



以死難為忠似不如以死難為烈此又名詞之所應為訂正者歟增

張宏洪武中官指揮同知北征戰死單家橋子鎮襲永樂中

亦以征水西戰死本條叙二人下同

王榮三上虞人洪武中以總旗從傅穎公征雲南屢著功績至

鶴慶戰死祀忠烈事詳名宦

周義興之子襲指揮僉事洪武中戰死弟文襲征交趾戰死

晉指揮同知弟禧襲亦以征交趾戰死先是興父庸一從軍

南征至一盩水戰死四人

周庸二臨川人洪武中從傅穎公征南留守興隆授千戶後甥

解苗反身犯賊鋒眾寡不敵力戰死事聞賜諡忠愍

### 黃平縣志

卷十五 勇烈

二

南黨唐忠臣霽雲之裔平越衛人永樂初以總兵官征蠻至

十萬溪力戰死屍立不仆苗人神之為立廟詳名宦傳

蕭琳襲指揮正統中以苗叛戰死祀名宦有傳

韓瑜福嗣曾孫景泰中襲千戶以征五開蠻戰死

權繼武安曾孫以功晉都指揮同知正德中征香爐山戰死祀

忠烈祠事詳名宦

余洪烈襲指揮萬歷中以勦瀾泥溝唐寨林狍戰死

沈鈺千戶暹之七世孫天啟中征陸廣蠻戰死

薛太和百戶聰之裔以功晉指揮同知崇禎中禦苗於石洞口

戰死

羅文郁恕卿九世孫明季以伯爵鎮衡永戰死

張文昌百戶洪武中陣亡八世孫其瑜後亦陣亡

劉宗仁百戶

夏時軍人

董邦仁軍人

以上三人萬歷中守東坡營拒敵死義者先是播酋楊應龍為逆糾九股苗窺興隆宗仁等募兵戍東坡以扼之力竭戰死而衛城因其時完守備卒賴以全事平郭撫軍子章梁少參銓檄守牧建祠祀之詳見余鄉賢懋學記中今碑為侵隱祀田者剗削姓名不可盡識矣惜哉

張緯南衛庠生

田惟貢衛百戶勝之裔崇禎中黑苗叛圍興隆適駐鎮司馬董

黃平縣志

卷十五 勇烈

三

邦昌監軍鎮遠衛城旦夕陷緯南惟貢念倉庫廟署及合城性命之重奮不顧身偕赴瀕請兵至濫橋遇匪格鬪死

盧聲先天啟時歲貢任桂陽州學正山寇郝賊逼城聲先謂家屬曰茲城不堅且人心渙散必不能全我職分當死汝等可暫避之皆泣去獨其女金姑年十五不肯行城陷聲先衣冠坐明倫堂罵賊而死金姑亦投井死進士王樞有詩二

張貴洪武中百戶征黑松林陣亡瑀之高祖也

狄琨字瑞石天啟四年貢生任平溪衛教授陞四川中江縣未之任值甲申之變北向痛哭絕粒七日死

胡其仁官指揮政績詳名宦志及明季孫可望之亂其仁與陳

一德李士林皆被執罵賊死事互見一德士林傳中

陳一德明末為指揮國變流寇孫可望據城改衛為縣一德抗  
言其脅王改制加賦事遂與胡其仁千戶李仕林同罵賊不  
屈死先是永明王由榔自粵入黔可望處之安籠無人臣禮  
從臣吳貞毓等十八人與李定國圖可望謀泄被害土人哀  
之收葬城南稱十八先生墓及一德等之死州人有詩云十  
八先生死不孤興隆抗節有陳胡云云一德妻余氏見節孝  
傳其時紳士多殉難者惜不可考惟解中丞立敬著稱後祀  
鄉賢而其仁祀名宦云陳族孫濱雍正末守城死  
李仕林明季千戶死孫可望之難事見陳一德傳  
白 真指揮興子宣德中征廣西陣亡

陳正心字知先智之子明季舉於鄉值土賊藍二變城陷被執

### 黃平縣志

卷十五 勇烈

四

不屈將殺之有賊酋何姓者素德正心乘間縱去遂請師滅  
賊永明王由榔聞之召為太常博士時丁未造顛沛流離常  
在左右後從亡緬甸王遇害正心殉焉子修聖有傳

解立敬明季官巡撫致仕為孫可望逼授偽職不屈死事詳鄉

賢傳

黃虞龍事見名宦傳

張問德字惺初弟問謨字顯文問德博學多才為文不屬草年  
十四入州庠有神童之譽崇禎庚午春自題其門曰雄才已  
就三都賦太史行看五色雲是年果中鄉試初令漢水有循  
聲晉昌平牧以病解職甲申國變朝紳人士多汙偽職問德  
微服間關南歸每談所見殉節事愛慕如不獲與者丙辰土

賊藍二嘯聚稱亂聞 大清兵至楚假稱投誠逡巡甕黃  
平間大肆劫掠問德助州牧黃虞龍城守會有內應數日城  
陷與弟問謨皆格鬪被獲縛至元真觀賊諭之降不屈兄弟  
皆觸柱死

張問謨字顯文歲貢生與兄問德偕死義事具問德傳中德無  
子以謨子嗣至今子姓蕃衍皆問謨後進士王樞論藍二亂  
民背明非順清也問德兄弟之死心存故主志事明如日星  
云

吳仲才其先四川潼川人隨征來黔仲才以征苗功署黃平武  
弁藍二之亂拒守岑山關戰沒

周希勲庸二曾孫孝宗弘治二年征盤江苗戰死

### 黃平縣志

#### 卷十五 勇烈

五

以上三十六人俱前明人為舊志之所載入忠孝志者

羅鳴序事見名宦傳

陳憲字學度不知何許人雍正末為刺史羅鳴序幕客值九  
股苗煽亂數為鳴序畫策啟上官增戰守具置不問苗旦夕  
至鳴序曰我守土臣分當死子賓客耳盍去諸憲曰古亦有  
死友公於我言聽計從安則利館穀危則去不忍為也城陷  
既死事聞贈國子監學錄賜祭葬陪祀羅祠 原列尚義  
黃進忠事在名宦并互見羅鳴序初震等傳

初 震字大生從弟咸字羣生俱州廩生震早擅文名與咸皆  
豪俠好義雍正甲寅麻哈牧羅鳴序來署州事延震及諸生  
李造唐張維慶陳謹章纂修州志書未成而苗難作先是台

拱苗不靖大兵方事征討旁近生苗悉恐遂勾熟苗為亂事已著鳴序以城惡兵單請於上官乞增兵防護七上不報九股遂亂警告日至民各奔避重安城陷鳴序慷慨誓與州城俱存亡震咸倡義激勸得楊士蘭等數百人分陴守時平伐營把總黃進忠奉調赴軍過州眾留助焉苗攻圍急城中糧盡力不支千總金升手刃妻孥潰圍請救鳴序亦率眾出戰死北門外城遂破震咸與諸生二十人及進忠士蘭皆巷鬪死後並陪祀羅公祠事互見鳴序進忠傳中震咸既死闔門老幼皆自焚死士蘭及同守兵民無一逃者二人遂無後志稿亦燬人皆惜之三人

韓 試弟詣從弟裕試字敷功增廣生篤學嗜古至老不倦嘗

### 黃 平 縣 志

卷十五 勇烈

六

云讀聖賢書當體聖賢行事詣裕亦知義有勇力雍正乙卯苗變試議倡義助城守詣裕踴躍從事試命妻張氏偕二娣率子女遠奔避賊未忍行詣曰先人嗣不可絕兄命是也裕曰苗無禮婦女宜遠辱皆當速去妻子曰然則盍同去乎皆曰吾輩亦去官誰與守卒遣去試佐州牧羅鳴序部署守禦詣裕執戈嬰城咸晝夜不怠城陷皆死之試子德壽後為州廩生孫啟泰以急公授九品職

韓 詣事詳前傳

韓 裕事詳試傳

黃文奎子廩生繡章庠生憲章雍正乙卯苗叛聞變者皆逃避文奎年八十一喻繡章等曰若人皆去官誰與守况爾食餼

者乎繡章兄弟遂從父入城助守城陷父子被害人三  
王 峻州庠生雍正乙卯苗叛與初震黃繡章等二十人倡義  
助州牧城守力盡救不至城陷皆死

楊士蘭州民雍正乙卯助諸生倡義號召數百人共誓死守城  
陷無一逃者惜姓名無可考矣

梁 璧巖門駐防把總雍正乙卯叛苗燒城力戰死  
何其仁巖門土司乙卯苗叛與同官張純全馮秉文協力守禦

力盡同赴水死叔土千總模陣亡人二  
張純全重安土司馮秉文攝朗城土司死事見上人二

吳玉音千總乾隆初戰蓮花壘死 賜祭葬予廕  
張 縉字碩彥少負雋才弱冠為州庠生性疎畧歲試以訛字

黃平縣志

卷十五 勇烈

置四等畏父嚴不敢歸匿旁村觀音寺學愈刻勵踰年試遂  
一等旋中副車越三年中康熙戊子科舉人居家孝友端方  
士林推重後為平遠州學正造士維勤孫初元從在署潛占  
籍入平遠學縉不知也遂以此去官雍正乙卯苗叛鄉人相  
率逃散時縉已病痺子兆舉肩輿請避縉曰吾雖無官守身  
受國恩豈宜先去以為民望欲入城與牧議防守兆舉力諫  
未果及城破終不肯去苗至端坐遇害詳載兆舉傳本志移  
入孝友

李紹銘州武舉孝廉光緒武舉光裕從子父光泗以磊落稱兄  
紹謨亦以武舉借補把總紹銘分發鎮遠鎮標効力署鎮遠  
左營千總事嘉慶元年奉調隨征銅仁苗奮勇常為軍鋒帶



兵至正大營衆寡不敵力戰陣亡事聞 賜葬祭子逢昇承襲雲騎尉

韓德智州城人從征緬甸有功授本營外委把總嘉慶元年調征銅仁苗戰檀木董奮力殺賊陣亡 賜葬祭兄子啟印承襲雲騎尉

張超把總乾隆中從征金川陣亡 賜祭葬子廕

張時華千總嘉慶初討川匪戰死 賜祭葬子廕

劉友鵬其先楚之黃州人買遷來黔家施秉徙黃平友鵬生有異秉左額連額下有赤記若塗硃及長有勇力善騎射投營入伍由黃平營外委陞鎮遠鎮標把總嘉慶元年從征銅仁紅苗屢立戰功陞長寨營千總攻巖坳寨殺賊陣亡 賜祭

### 黃平縣志

卷十五 勇烈

八

葬廕一子朝勇雲騎尉引 見發鎮遠標學習期滿以守備補用五年隨征廣順平苗有功 大中丞琅奏加都司銜賞戴藍翎

論曰語有之子死孝臣死忠生人之大節也顧其中亦有不盡同者此篇所志如陳一德抗議僭臣不畏鼎鑊其最烈矣胡其仁李仕林事雖不詳既與陳同官同死其同志可知也解立敬退處舊臣可望起而用之亦假永明之命非使其事已也立敬知可望之不臣而永明為虛號餓死不屈非見之明守之定能若是乎乃陳正心能計脫藍賊之囚而甘從永明于顛沛此時豈復有富貴可戀茲所謂智可及愚不可及者歟蓋抗可望者人臣之節而從永明者君國之心孔子稱

殷有三仁諸君子蓋庶幾焉至近世九股之變惟焚殺是肆非有據土壤竊名分之思楊應龍則小蠢跳梁藍二又安庸之尤者耳士大夫不幸見執固無可倖之生若無官守而先幾避之未足為罪也然張緯南張問德初咸諸人或犯難請援或捐生拒守寧謂非同澤同袍敵王所愾哉若夫數百年中在行陣者死于戰職守土者死于官斯又分義當然視彼遂巡遁逃陷于罪戾者相去遠矣夫君父一也則張兆舉張于昌魏紹堯輩目擊親危效死無去固當與陳解同科即周淳李際時等按此五人己移孝友傳中或甘勞瘁而不渝或遭讒間而愈篤其心又豈與正心立敬異耶按舊志忠孝合傳故此論語亦合忠孝而贊之

以上二十六人除劉友鵬一人為修志後之所添入餘俱前

### 黃平縣志

#### 卷十五 勇烈

清嘉慶以前之人為舊志之所載入忠孝志者

楊州牧承照號杏農江南省某府縣人由丁酉科中順天舉人考取教習分發來黔咸豐甲寅到州任事次年即逢苗變先是江南失守南北道梗貴州騷動各大府諱盜不報楊牧未來前任周竹樓知苗人有事乃借培文風籌捐數千金修治城垣及周去遵義楊隆喜亂作清平屬之凱塘凱哨苗被其勾結聚數百人於乙卯年二月十六日劫老里霸陳義泰家得銀八千作路費往投楊逆月杪楊逆敗竄授首於葛莊司各苗見無兵援又戀舊城之富遂結隊三千餘人於三月二十一日前來撲城適銅仁兵過站卸任提督趙某亦來賊遂潛往舊城燒燬東門外城楊牧夾趙軍等往救賊始遁牧因

屢稟求援且言苗逆之惡已彰非痛加勦洗不可大府以楊  
逆就擒未可再起波瀾且兵餉已空一意講撫乃委彭汝瑋  
陳毓書等携銀三千作犒賞費來安叛苗行至楊老值圍州  
城逗遛不進五月行抵勝秉苗人聚眾圍台拱汝瑋等因鎮  
遠兵擒數十人台拱圍得解汝瑋等至巖門司六月三日司  
城失彭陳兩委員及邢千總死之清台之苗遂合州屬叛苗  
日來圍城六月鄧海山糾團數千來救死於尖山坡苗益得  
勢至是無日不至城東南西門除一望外禾不得收城緊甚  
牧屢稟大府皆不為意而州城兵至藩署領餉不得且言苗  
務未報無由得知兵回宣傳此語紛紛詈牧有欲叛而殺牧  
者牧為解說萬端得稍息免然至肅清回城猶有以此怒牧

黃平縣志

卷十五 勇烈

十

者後由賀叶六在華容得牧家書及稟首府各稿寄州得悉  
當日事實始知牧之死猶受屈牧由此憤甚以屢次稟稿抄  
報滇督各署及中央部堂且言憲意欲令官民猜疑置末吏  
於死地何不死之於法之為愈即使無法可死何不參劾顛  
撲而死之於饑餓道途矣必陷國家之疆土棄億萬之人民  
而令無限奇冤結成戾氣使春初蠢動聽某所請以一旅之  
師痛加勦洗則事半功倍何至燎原如此今之通詳並直揭  
部揭科以冀挽回殘局於萬一只知為民請命非徒明一己  
之冤也稟發兵終不至牧與二弟仲某書曰兄之眷口若走  
未免駭人聽聞且臣死忠妻妾死節子女死孝古人已有先  
我為之者况先大父生而純孝沒為神明先大夫賦性耿介

守志冲和而忍令其孫子不肖貽憾九泉耶是年六月大府  
委貴東道承子九督辦下游苗務承至清平只以激勵鄉團  
勸捐助餉敷衍從事乃告急紛至未知如何下手兩次委員  
來接收篆均不敢至牧守圍城無兵無餉亦惟激勵城紳與  
各避難鄉團朝夜苦守以盼兵至而已彼時苗人最愚未知  
攻城之法故又延一年至丙辰九月十二城始陷牧與夫人  
王氏及家小均死之長子恒錫號子純年甫十二有廚人某  
負出北門及橋賊知為公子殺之廚人逃去後遺一弱女為  
吳太謙所得安定營來太謙首先投誠携交唐鄂帥帶至省  
垣配婚某知縣或曰城陷時適牧巡街至龍淵書院因入講  
堂自刎就義又曰牧由書院入謁 聖宮朝服死露臺上之

黃平縣志

卷十五 勇烈

十一

桂樹下未知孰是先是牧扶乩云有時淵內龍飛去脫俗超  
凡始出頭蓋乩仙已先知也牧之通詳及家書另載藝文志  
中

陳州牧世鑣號鸞生四川筠連縣某科舉人州城失後於咸豐  
丁巳年奉委到任帶兵數百駐紮舊城時賊勢已甚加以教  
匪潛發牧處危城帶兵四出斬獲頗多牧勇畧善戰羣賊憚  
之教匪賀昌明所謂賀二王者甚猖獗與沈中和陳明忠何  
得勝即所謂何二強盜者王廷英即殺人王譚光前等領萬  
餘人擾平越州之羅背羅坳破之遂搗牛場入圍甕安縣城  
立營數匝牧帶練勇團兵救之圍乃解牧名更震未幾賊復  
擾平越屬之牛場牧往援之已至上壩大隊前進忽出數百

人截之牧僅有護兵十餘人在身寡寡難敵遂死於甘棠從人無一脫者後將屍收回葬於舊城西下街之下井光緒十一年牧子灃來攝州篆移柩回籍復以衣冠葬之立碑以誌墓碑刊牧以道銜追贈入祀昭忠灃以雲騎尉出身蓋牧之戰沒蔭之也十三年丁亥川人甘雨時署甕安縣為立盡忠碑於其地載甕安縣志中

按牧沒為咸豐七年歲在丁巳而甕安縣志據平越州志謂在八年六月是時距失舊城僅三四月杜州牧何以能來接篆而甘雨時之刊碑稱在六年六月亦誤不知咸豐六年九月失我州城猶是楊牧在任蓋中間猶有陳牧李都司兩人之在舊城時維七年丁巳也

### 黃平縣志

卷十五 勇烈

十二

杜琢章號寶田四川開縣人由進士出身陳牧戰沒奉委來攝州篆駐軍舊城年餘戊午八年十月朔舊城被苗攻陷殉難於城今六十餘年其事述少有知者

李春華大定府人奉回教本提標千總咸豐丁巳年奉調來援遂署黃平營都司時州城已陷春華與陳牧同守舊城收集散亡頗有勞績戊午年冬舊城復失春華外逸省署讓之令帶罪立功仍署都司領千餘人轉戰甕黃餘慶間當時城陷聶老姜公由甕谷隴敗回流民無歸各據地稱元帥將軍於是石韓馬元帥諸人更有賀昌明何得勝等擾甕安春華移軍太陽堡場後之營盤山上各匪圍之月餘糧盡援絕不得已與匪議和各不相犯春華至石韓諸營並未加害旋復

於營下議事乃帶一僕懸一劍往各首邀之吸烟馬賊突來  
聲言李大哥對不住人稱大哥者蓋各教匪之稱謂而加以  
會匪之詞也隨提刀砍之韓石兩匪勸阻不得春華拔劍與  
鬪眾匪湧至亂刀齊舉斫死營下僕從從營下呼之營內兵  
即驚潰匪圍殺之各兵久困莫支連相隨間散勇及正兵共  
三千餘人呼號震天血由溝流徐徐有聲其不死者非有相  
識力保即拚命奪出僅什之一二而奔脫之帶傷者又什之  
四五今都司入縣昭忠其有蔭襲承嗣否路遠事遙不可得  
而知也

王州牧紹鏞逸其籍貫出身戊午冬舊城失後來署州事時無  
一寸淨土牧在太字甲挂捐招勇數月教匪四起遂遇害入

### 黃平縣志

卷十五 勇烈

十三

#### 祀昭忠

鄧福照號春台畢節縣人由舉人選授黃平州學正舉孝廉方  
正未應丙辰城陷死於學署書齋其公子亮輔護篆逃北  
門及田因畔高難越遂被苗害

高殿選逸其籍貫出身官黃平營都司城陷時殿選持兵上馬  
四面殺賊越城追賊力盡而亡或云在校場戰沒後獲屍於  
將台之下蓋州城失於鷄鳴後至次晨日上許久兵團猶在  
北門校場內與賊相持久無救後乃各奔潰

何州幕某逸其名州牧楊杏農之刑名也城陷時護篆欲越城  
不果死於州署左火藥局傍內城下

馮毓貞朗城司土吏自苗亂移於城中丙辰城陷與高都司同

時陣亡二子及閤家均被害

王世榮州屬重安人署重安汛外委苗亂陣亡後王世華蔭襲恩騎尉今亡已久無從考其事實

蔡文棟逸其籍貫出身署黃平州學正城陷死節

柴雲恩逸其籍貫出身授黃平營千總城陷死節

蔣邦泰逸其籍貫出身黃平營某汛把總城陷死節

劉朝龍號萃田州城西鄉人於道光二十二年隨貴西道鄭世任往援江浙繼隨羅澤南塔齊布等攻克定海湖口皖江及牛莊塘姑等由都司保薦至協鎮都督府并得銳勇巴圖魯勇號道光二十七年克瑞州陣亡事聞照副將例議卹予騎都尉世職子啟盛襲啟盛由黃平營調援興義在鎮陣亡次

### 黃平縣志

#### 卷十五 勇烈

十四

子啟發襲替

劉朝剛朝龍弟兄也亦於道光二十二年薦往楚軍效力由多隆阿江忠源各帥保至花翎游擊陣亡於德安予卹如例

劉朝貴亦朝龍之弟兄行出兵兩廣及湘湖江浙由伊里布向日榮曾國荃等保至花翎都司亦陣亡江浙

劉啟厚一名雲山咸豐七年由世襲雲騎尉收提標營九年委署水城營中軍守備十年營主某出兵陣亡啟厚以中軍官護游擊篆同治元年匪至城外啟厚帶勇出敵陣沒於水城外之某橋同治二年事聞予雲騎尉子國炳承襲赴雲南箇舊啟公幹回光緒十一年委署黎平營中軍守備因案撤省十三年委署貴定都司未赴任病卒省垣

按劉氏諸人為舊志忠孝傳中劉友鵬族友鵬子朝勇另傳如後

沈興州署右班之總撥役也勇敢善戰隨侍陳州牧世鑣往救甕安至洛柳遇伏左右散去興獨負牧行山谷間賊及牧度不得脫謂興善走令逃去興不從力負以行三走不脫與世鑣俱死賊手

按鑣傳謂死於甘棠此言死於洛柳依耆民口述也究不知兩地是一是二惟興以一撥役死忠不以執役異也亟起志之為士夫勸

許文科南鄉重安人乙卯苗叛重安失守避居縣城城陷協兵團巷戰力盡遇害於北門城堞今該處立有碑記

黃平縣志

卷十五 勇烈

十五

黃安邦南鄉天堂寨人文庠黃獻清之子以武童投入趙營由什長提升百長歷保都閩在龍里五子登科陣亡

吳朝鑑大鼓礮即三人在定捷營効力保藍翎千總後在養龍母猪陣亡

王瑚亭城南黃猴堡人王炳南學師之四叔也逸其名叛苗攻城王奉揚州牧命巡視下水關及城陷逢苗進城手刃二賊苗眾至其繼子某救之不獲父子同死此照炳南之浮生紀畧採入

孫翹江事詳宦蹟中

龍勝榜青溪縣人黃平把總

何正貴台拱廳人黃平外委



按貴陽府志載此二人與韓德智並註曰韓德智黃平人此三人貴陽府志載稱不知何事寄主昭忠祠內當是出兵戰沒貴陽境內今查出補登德智已載舊志不再具包興逸其籍貫出身黃平營某汛把總城陷死節何成基巖門司長官司也苗亂帶鄉兵入城同守賊至城下督兵出戰陣亡

邢連科貴陽府人即今邢端內翰之祖也任黃施衛衛千總時千總署駐巖門司咸豐五年六月初三日巖門司城失守與委員彭汝璋陳毓書等同遇害連科閣門自殺其子名士義某科舉人至署省親遇難亦自殺

陳毓書逸其籍貫出身龍里縣知事楊州牧家書謂清鎮縣與

### 黃平縣志

#### 卷十五 勇烈

十六

彭汝璋同充委員至下游安撫叛苗咸豐五年六月初三日與彭委員邢千總同死於巖門司事詳彭傳

彭汝璋號貢父江夏人逸其出身署古州同知楊牧書謂為候補知州咸豐五年與陳毓書奉委馳救台拱至勝秉禽數十苗因撫降之遂解台拱分府圍未幾清平之凱崇凱哨苗復起五月十一日汝璋毓書馳救次巖門司十五日苗攻司城擊退去二十九日復大至城僅數百戶無宿糧又乏水汝璋等所將兵練半撥回勝秉戰守皆不足恃乞師於鎮遠總兵遣三百人至移之勝秉十五日告急於省會尚未應漢民范八者與苗通汝璋等雖知其奸姑羈縻以待後六月初三食盡援不至急馳入衛千總署索范八則已偕千總邢連科之

子舉人士義逸去城遂陷連科闔門自裁汝瑋毓書等皆遇害汝瑋毓書當道光末曾從鎮遠知府胡林翼黃平知州徐豐玉勦革夷苗為羣夷所畏惡至是皆醢之士義亦自殺八月汝瑋之弟湖南候補知府汝琮至黔以衣冠招魂斂為其子具哀狀備訴同官時大撫未奏苗亂謂漢夷爭鬪汝瑋等往治不得下落狀出撫軍不自安署貴筑縣及麻哈州某某等詣汝琮責收所赴狀士庶以收歸赴狀為異聞爭求之一二日傳觀編窮巷益不可收其後舉哀從撫藩下至府縣各官無一至者汝瑋沒時年三十二歲

以上彭陳邢等三人及附一人由獨山莫友芝邵亭遺文內所採入其傳語悉用莫子思書彭氏赴同狀後又書後之語

黃平縣志

卷十五 勇烈

可與楊杏農州牧之家書同看當知苗亂之原委

許中奇縣人官歸化營游擊歸年八十有奇丙辰城陷焚香叩拜祖宗並謝國恩畢從容自縊而亡子如嵩號壽山並殉難

人二

劉朝勇西鄉仁里人友鵬子也年七十餘由世襲仕至都司附舊志劉友鵬傳城陷啟北門管令長子外逃獨自刎死

王兆熊本城人王序東之族嗣也以武庠充黃平營百總年七十餘城陷手刃多賊後自刎子名河清亦武庠兆熊遺令出力報國隨亦殉難兆熊刎後家人無不自刎嗣遂乏遺有馬

店街街基光緒中年為族人變賣人二

張占鰲縣人黃平營百總城未陷時戰沒於陣

周某逸其名號籍貫人以都司傳之丙辰城陷難民至舊城時  
周發米賑濟後出兵戰死於甕安木老坪所謂周都司者是  
否來任黃平營事當時難民少有知其故者

鄧海山平溪鄧光榮之伯也咸豐之亂乙卯六月與楊安邦糾  
約團丁數千來援州城每出城戰苗均不敵六月二十六日  
苗匪設伏於五里橋海山等獲勝追至尖山坡伏出截之首  
尾不接海山戰沒於五里橋左

張耀模舊州北門外茅栗屯人張啟福之父也素有勇力鄧海  
山來援州城耀模同來每戰輒勝六月二十六日遇伏戰死  
於尖山坡苗匪惡之割剔心腸以亂石實腹中

張夏烈老王屯人有勇力鄧海山之來援夏烈入其軍中每敗

### 黃平縣志

#### 卷十五 勇烈

十八

賊六月二十六日遇伏猶與海山耀模等力戰自辰至申首  
尾懸絕無一援兵始戰沒

按海山之戰沒同時亡者甚多乃城陷一十九年人民喪亡  
什之九五及今又四五十年僅於故老傳說間得此三人焉  
亟紀而表彰之餘即可以概見

張三盛西區木江人有膽識咸豐之亂與同寨劉文魁集合鄉  
勇捍衛一方相持既久賊眾援絕戰死於老鴉山脚

鄧玉書州庠生西鄉濫泥溝人其地有洪塘營為前明之舊壘  
至雍正乙卯之變哈將軍復營於此咸豐之叛玉書與本寨  
之吳勝乾糾合鄉勇數千重修遺壘紮營自衛賊不敢犯州  
城被圍及平越甕安告急玉書等每往援之及兩城失後孤

立無援且無糧米兩人遂戰沒於野洞場

吳勝乾西鄉濫泥溝人與庠生鄧玉書同事同沒

沈德美州庠生南鄉蒲草塘人咸豐之亂約集鄉人營於馬鞍

山為南鄉自衛松銅兵過州州牧令作鄉導在路遇匪被殺

德美時年七十五歲

鄭時潤東鄉新莊人城失後避亂浪洞場遂在場上辦團屯於

米寶寺中寇至率團鬪之獲勝追至南嶽廟失利陣亡

周興仁舊城曹府壘人乙卯之亂帶領鄉團保衛地方舊城一

方全賴周力人以周大鄉公稱之蓋當時鄉約即今團首之

稱周與上塘之劉大師傅不合互相爭鬪劉敗州牧某由首

入境劉極誣之某到任斥不用周後周子某在龍王閣勇戰

### 黃平縣志

卷十五 勇烈

十九

得逆人首級州牧喜復用之而軍器已失不如昔之猛勇周

乃戰亡舊城因之不守人多惜之

蕭國銀北四區人乙卯之亂教會四起國銀率領團丁隨李都

司春華各處戰爭未幾陣亡

彭煒章州人道光丙午科武舉任松桃守備在任陣亡於黃飄

已立祀昭忠祠

沈思忠蒲草塘人咸豐丙辰年帶兵至藍家關攻打巖大五陣

亡

瞿興源

與劉國詩均康衢堡人賊至臨敵陣亡

劉國詩

見上

劉廷芳城西野洞場人乙卯之亂紮陡壘營臨敵陣亡

戴武秀才逸其名乙卯之亂帶兵至平良打仗陣亡  
余發順北四區之小鼓礮人帶團丁隨李都司出力李紮大營  
坡時余分紮三星場後李營潰後余投田營及張文德各軍  
帥保至花翎參將後在石阡荆竹園陣亡

黃品清南區重安江人廩生黃楹子從戎趙營於同治三年戰  
沒於開州城下

劉發恒事見宦蹟

榮忠壯公維善黃飄大均戰亡之驍將也號某湖南東安縣人  
以軍功至提督咸豐乙卯之亂下游府州縣盡失十餘歲無  
寧日苗匪四出難及相省周洪印駐軍沅州惟以守邊為事  
歲糜巨餉無有休日湖南巡撫劉崑力主進勦於是以席廉

黃平縣志

卷十五 勇烈

二十

使率兵援黔維善副廉使由黎平天柱晃州銅仁等攻入然  
節節進取甚需時日而湘士多非難之後益萬人獨以付之  
黃潤昌而以鄧子垣為副廉使因謂之曰言苗事者必曰雕  
勦夫雕勦者縣軍深入饑因敵糧宿因敵壘行不持營帳居  
不依城砦軍不時出出不時返乃可以入虎穴而得虎子然  
其敗也莫救昔岳鍾琪張廣泗之所以戡定苗疆今惟君可  
以繼之維善奮然請行於是率所部轉戰山谷間南入清江  
百餘里懸軍五六日莫測所至時越大砦而攻小砦或已過  
復還一日驟至清江北岸苗望之以為部眾刃發乃知為官  
軍冬月大雪席軍亦不知維善所在俄而還營簿功其出沒  
不常如此諸苗由是披靡同治八年春鎮遠八弓天柱台拱

清江悉平維善由施秉白洗馳入三月十八日開拔鎮遠十九日克施秉縣城二十日破白洗二十一日破寶谷隴公乃謂定中營黃廉使曰吾軍不立營幕利在用少今連軍大進維善六千人精銳久疲宜休士贏糧乃可進也廉使雅重維善因止壘不進軍中以為功在指顧間疑其專功乃以言激廉使二十二日四鼓黃廉使及鄧觀察等忽拔隊起行維善聞之愠且笑曰以我不能進耶反先發天明渡大坳至黃飄勿敢阻者潤昌軍至敗於陰陽壘一名懶板堯又名寡蛋坡維善遣蘇元春返救兵潰不進久待聞黃鄧兩人死乃大憤怒袒衣持刀入求其屍獨親兵二百人從遇己潰軍道甚狹行列俱亂苗人得勢聚益眾數千人圍之無一援救兵饑甚

## 黃平縣志

卷十五 勇烈

二十一

復潰圍出反攻山間若破之得其食復出擊匪三圍三潰終不得脫至夜諸苗裂炬守之凡三晝夜時右路分統蘇元春中路分統徐啟瑞等早奔至州城安定營之總兵謝洪章等列營城中分米餉各敗軍未知維善在圍故三十里內無一往救維善及二百人俱戰死有曰苗人獲維善深惡之以鼎鍋燒紅着於頭上詈曰大紅頂戴維善罵不絕口而亡此皆得之湘軍志及國朝先正事畧中東區中有曰黃軍敗後維善尚在翁湧一帶其先出者乃蘇元春及中路分統徐啟瑞也然苗人只知通謂官軍知誰為分統正統維善既死席廉使縛蘇徐兩將欲斬之湘省為之震動然匪勢由此大衰實雕勦之力為多苗疆諸府廳州縣至今無不感席硯蕪廉使

而悲榮軍門所遭之不幸奏入諡忠壯入祀昭忠其子嗣蔭襲如何相省當有專案惜國變未易得也

黃廉使諱潤昌字邵坤湖南湘潭人以諸生見賞於禮部主事四川李榕薦之曾九帥乃招降程學啟克復江寧潤昌統領坤字營苦守雨花臺並攻克天保地保兩城皆有力及江南平以按察使用並加布政使銜因省親回籍同治六年湖南會匪蠢動巡撫劉琨委充營務處募定中四營於湘省七年劉琨疏請入黔與記名布政使席寶田會勦十二月抵清溪度歲先是苗匪擾至湖南二十年中兆琛以知縣至布政使周洪印以千總至總兵均領軍無效乃起李次青方伯以平荆竹園久攻不下奏奪一級更以席寶田募萬人繼之又一

黃平縣志

卷十五 勇烈

二十三

年寶田請加兵議者藉藉復以廉使領定中營來副之以鄧觀察子垣潤昌抵青溪鄧軍正饑潤昌分糧餉之八年正月募嚮導二營舉軍大進連克焦溪湧溪鴨溪及兩路口等抵鎮遠往與席廉使商席與榮提督十三營由寨頭起拔潤昌與鄧子垣將萬人同至施秉三月二十一日齊抵甕谷隴獲牛二千餘隻潤昌為招撫示繫之牛角驅而散之四鄉苗人見之皆願薙髮投誠榮提督思休軍後進潤昌後至不知苗人之善於乘虛官兵勝則四伏不出一有失利羣起為難歷來之兵多以此敗且道路之險惡折曲起伏不可名狀人從後來前去者迴環反與後來人對面其上山者後之頂與前之踵相接潤昌未之知欲以長驅直入之勢從北繞出而攻

黃飄白保諸寨復被間者以為榮提督思獨專功不俟天明  
乃拔隊往榮軍聞之更先往二十二晨至陰陽壘之陡壁處  
苗伏林中以鳥槍銃鄧觀察墜馬軍即驚竄諸苗從高處擊  
以亂石人馬多傷復從巖壁上鳴角鼓譟山谷相應聲撼天  
地諸軍四潰反自踐蹋一時前不應後又無營壘以扼守之  
饑疲交困遂至不振子垣中槍或勸潤昌急走可免潤昌曰  
星階因我出師星階死吾何生為乃與幕友營弁同即於難  
或曰潤昌姓黃山名黃飄誠飄泊也潤昌七年二十有九入  
報得旨照巡撫例賜卹賞騎都尉兼襲雲騎尉世職本籍及  
死事地方勅建專祠將生平事蹟宣付史館予諡忠壯

鄧觀察子垣號星階湖南新寧人同治六年長沙出省城防兵

### 黃平縣志

卷十五 勇烈

二十三

附以沅北戍兵共萬人以黃廉使為將觀察附之出晃州北  
路而令席方伯為廉使專攻南路次年春同至鎮遠及破甕  
谷隴三月二十二日出攻黃飄蘇軍門元春時當右路分統  
與中路分統徐啟瑞帶精毅營在前黃廉使潤昌帶定中營  
斷後觀察帶精捷營接應共軍二萬由黃飄白保出發前軍  
已至大坳苗人四竄潛伏山谷中各軍連日俱勝皆玩敵潤  
昌軍後來恐席軍功出己上頗爭勝日上行至陰陽壘兩山  
均箐林路曲屈斜欹馬不能進數苗藏林中放數槍中觀察  
軍士驚訝以為中伏爭奔逸諸苗伏谷中見軍竄各出呼哨  
槍四發角聲應山谷兵愈益驚互相踐蹋諸苗出據險要楚  
軍不知山徑具奔至遵路堡有從河下者以為緣溪而去必



有蹊徑殊十餘里均絕壁有由李三寨竄者以為山徑必有出處殊十餘里均大山有從陡巖下躍者意巖下或有路殊下更高反為懸壁所阻諸苗據兩山拋木擊石死者無算十一年署本城都司李佐臣回里檢骨在各懸壁下得骸骨一二十批者不知凡幾計苗疆之死老姜公帶至者男女五六萬逃逸惟什之二三楚軍之死又二萬人湘中各志諱而不記其他一二千三五百者不可枚舉觀察中槍榮黃兩帥相與戰七川軍時在新舊兩城及重安各地為之太息但楚軍雖覆敗而施鎮以下之苗已被深創次年春川軍復至東區各寨大加懲創苗亂由之而息至今州人悉感佩死節各公欲立祠以祀之惜地方多事無由籌其資也

黃平縣志

卷十五 勇烈

二十四

羅萱字伯宜湖南湘潭縣人父汝懷道光丁酉拔貢芷江學訓導萱為諸生賀督部長齡及學師縣令均器異之咸豐四年曾文正率水師東下辟掌書記謂曰今專足走近文旆望即日戒塗無為曲禮臆說所誤蟾蜍觸沙而不行於兔騰風而萬里士各有志不相及也於是從文正至贛及皖均有戰功備詳先正事畧萱每策騎從文正文正口占書疏輒操筆寫就後至衡州與劉總兵培元謀軍事並首從兄提督逢元於當塗且應郭萬燾招致粵撫署中均不肯留自以文士不欲棄科名屢回籍應試卒不過同治七年黃廉使奉檄援黔萱為綜理文案每晝出領隊夜歸削牘黃甚重之至戰沒萱與文武將領計一十八人皆死於黃飄火均萱之文翰流美性

極恬退從軍十數年不圖仕進初從水師東征叙訓導入江西遷知縣加知州銜在安徽彙保同知留江西補用樂昌解嚴加知府銜克鎮遠晉知府及死優旨視按察使陣亡例議卹賜祭葬贈太常寺卿賞騎都尉世職祀榮忠壯祠所著有儀正堂文箋注二卷粵游日記一卷蓼花齋詩詞四卷

彭永清總兵

凌子龍總兵

洪亮參將此三人皆與黃榮諸帥同死於大坳者照先正事畧榮忠壯傳中採入其事蹟不可得而考也

鄒泗鍾號某鎮遠縣屬之邛水人精捷營之某營將領也與榮黃各帥同沒於大坳當時未有知者後於光緒二十五年其

黃平縣志

卷十五 勇烈

二十五

長子馨蘭由雲南按察使還往立神道碑於盡節處始知其名碑為署州事陝西史鸞書所刊泗鍾次子馨德四川補用道孫銘璜琪培鈞煒今鎮遠府城有鄒太常專祠由二子錄奏得旨以太常寺卿追贈也

姚總兵華萃安定營之將領也咸豐之變苗由沅水清江下者擾及湖南由正安桐梓去者擾及四川唐炯在蜀建議以防二千餘里歲糜百萬蜀已坐困但理財莫若節用節用莫若裁勇裁勇莫若援黔總督崇實公依之於是以炯領安定營劉鶴齡領果毅營唐大有領振武軍均歸炯節制乃由烏江河畔節次攻入招降教匪苗犴甚衆己巳春楚軍覆敗得唐軍安紮州城及重安苗不得肆庚午二月炯由成都回營次

督軍逼近苗寨由炭坑哈龍攻至巖鶯壘四月十一日劉提督督十營由巖鶯壘進攻加巴牛場至仰朶賊分三路來拒並有革夷三秉及清平屬之旁海悍苗數路圍抄衆至二萬劉督諸將轉戰自辰至酉始拔其巢禽斬千餘華萃奮勇當先因於是日陣亡

楊通祥都司亦安定營之將領或曰州東區人同治九年庚午四月十一日唐軍攻仰朶與姚華萃先後陣亡是日士卒傷亡亦百餘人

按平越州志謂四月初九日提督劉鶴齡督十營分路進攻巖鶯壘苦戰數日掃蕩數十寨禽斬逆苗數千總兵姚華萃都司楊奇清楊通祥同時陣亡而成山老人自撰年譜中不

### 黃平縣志

#### 卷十五 勇烈

二十六

有奇清且異時日不但劉軍之攻入巖鶯壘在九月彼固合而言之豈楊奇清之陣亡成山反遺之耶當依年譜為是駱安邦教島陣亡之守備也唐軍由巖鶯壘加巴等攻入駐軍甕谷隴分兵雕勦以次掃蕩蝦蟇塘陳溪黑冲及新莊白保各寨五月十二日冒雨進擊至教島賊數千家藏聚洞內官軍伐木數萬縱火焚薰并加硫磺全洞盡沒兵攻十八晝夜安邦陣亡死傷兵士三四百人但是役也斬獲極多苗酋楊文章被斬李阿金滾巖而逸官軍獲軍械數千時楚軍亦攻至高山甕板苗陔由是大息各將死亡實有造於黔之下游不少

林時芳號維炳舊城西門平西壩人州庠生戊午之變舊城被

圍教匪四起聶老姜公鴻倫駐兵重陽坪何二強盜得勝駐兵大冷水時芳請於州牧願往說之至何說陳說罷兵何義而釋之至聶所聶已聽之惟臘望白某在聶處自號白將軍者疑為偵探執而殺之州人甚惜子應蘭亦州庠孫鍾琨逃避於外病亡林遂之嗣

李鳳翔字占標城北太翁堡人兩城陷後入營充兵屢立戰功升至藍翎守備後在首內投效趙營出兵陣亡同治十三年奉行咨得予騎都尉世襲完時給予恩騎尉世襲罔替子之弟五人四鳳綱雲南大理提標某營把總六鳳典入孝友傳劉思亮字文魁人稱劉大師傅謂其有拳勇也上塘烏梅河人乙卯之變揚州牧委帶團練守上塘一帶勦匪最力因事入

## 黃平縣志

卷十五 勇烈

二十七

城州牧出城遠迎勞金四十並予功牌忽匪來擾烏梅河其弟方州急走告之思亮回即誅二十餘人匪逃匿白巖又追之禽斬三百餘名州牧親往勞之改烏梅河為得勝河平越州告急思亮往援至羊牌斬賊無算各截其耳回營稱之重得七觔餘兩高州牧勞予銀米牛酒清平告急又往救援出婦女數百令各親人領去鎮遠鎮陳德公被圍羊腦思亮往救陳兵乏糧命弟發魁解米予之某協副將楚克昌被困馬場坪更往援之均獲勝孝軍門聞其名往召之令攻濫壩股匪巴軍門令援貴定某巡撫命救開州有功保至藍翎守備委署新化營游擊未到任州城陷陳州牧世鏞調回舊城陷後往援平溪陣亡於二郎巖

楊國安本城團防營之隊長外縣人在縣充當團兵遇匪勇於  
上前縣長陳愛之提當隊長招安軍首田忠國被匪捉殺調  
各團兵往援至北鄉楊泗坪與匪遇各放槍楊力與鬪正猛  
間各兵首領已暗退楊回顧止一兵在傍然敵已至前惟力  
拒之殊舉槍銃賊槍先鳴其彈已貫槍中葯然兩彈在槍  
力過猛槍遂炸不得已執身傍兵槍以敵機又停賊兵四至  
被殺後將其屍昇回腸腑已被剖去此民國八年冬月事也  
吳恩元與解德陞同來之兵羅匪入城各兵力戰匪插一旗在  
東城垣上益殺益來曹培倫紳耆謂此賊目也需拔之賊乃  
退吳乃前進奮拔其旗甫回為匪槍所中而死旗亡賊眾乃  
退皆吳之力

黃平縣志

卷十五 勇烈

二十六

戴錫賓名家齊以字行城西湛露堡人年二十充堡總旗地方  
公益志勇為之鄰近有警即率兵往嘗謂城中人曰無論何  
地有匪緝須召我民國二年五月廬州牧嚴方親往太在里  
勘地并順道清鄉錫賓聞之率十餘兵隨往抵舊城聞猴場  
劫於宋京臣等將征發進勦錫賓喜曰我又得立一功矣其  
年盛喜功如此兵未集波洞橋任姓被劫於邱喬二簽兵往  
緝錫賓慨然請行至邱所眾入室錫賓與七兵馬雲臣截於  
外聞室內兵已獲匪忽槍鳴馬手內錫賓顧問之而彈子穿  
腹出矣逾時即逝牧獲雲臣問之曰我與若生同一路死亦  
當同一路請償決而已或曰雲臣實滑機或曰昔雲臣非為  
錫賓緝送於官獲釋後錫賓故恩結之雲臣實藏於衷今乘

機銃之如然雲臣發槍胡不逃逸盧牧依法處後州人哀其沒於國事為之設奠於城自治所至者百餘紳挽聯極一時之盛盧牧及兩城紳商賻贈二百金於其母與妻子更署木主於昭忠祠內春秋附祀之

以上七十三人除余發順劉發恒彭煒章等數人不在州地死節外餘俱咸豐己來之變盡節於州或守城而死或戰陣而沒其為忠烈一也惜老成亡盡又加二十年之兵戎其同時守陴陷陣者亦均次第亡盡無由知其名諱今之所記不過什伯中之一二其所不知惟有付之莫可如何耳

吳德剛號玉廷城西柞口寨人家貧務農有勇力十七歲時牧牛於山虎來咬牛去德剛追及捉虎尾並後腳連掇之虎立

### 黃平縣志

卷十五 勇烈

二十九

斃明年苗匪百餘劫老里壩歸過寨後猪市坳德剛糾約子弟十餘人伏路截殺苗匪斃二十人城陷後入各武營所向有功保至花翎副將楚軍之敗大坳德剛在其軍中得知山徑導蘇元春領敗殘由尖山坡入城德剛之力也同治十一年癸酉苗亂初平德剛帶兵紮東坡年餘解兵歸農年八十餘卒嘗語人曰吾不願為官願作太平一耕叟耳

### 吳占勝事詳宦蹟

李芳春城東遵路堡人身軀偉大兩臂有千觔力能敵數十百人性豪俠見不義事輒與人鳴不平以此為仇家訴於台拱廳署因會黃平州合百餘人拘之被其毆傷而散乙卯亂起正欲入營效力旋病死後以子永興貴封建威將軍

李永興事詳宦蹟

李永祿事詳名宦

李永福佐臣之胞弟在軍營甚為出力遇敵至不論大小即持矛俯首而去有進無退每攻營壘騰身而入各兄恐其亡身每阻止之錫三統領愛其勇常留身邊外人不知每誤為其胞弟後保花翎副將因好賭妄言且失明故未仕

李尚榮事詳宦蹟

王興貴州城人為州署散役乙卯之亂賊臨城下王出殺賊屢立奇功因提升撥役領班戰輒殺賊揚州牧因點衙役之有力者與王帶之苗匪遇之不敢與戰勇力者多附之儼然一隊長也前清重門第及出身王以皂隸不敢與士兵齒及城

黃平縣志

卷十五 勇烈

三十

陷猶帶領團兵轉戰黃甕間至遵義官紳倚之殺敵乃有四貴之名後以功自矜多不法各勇目每輕之王反與賊通被官兵偵知殺於遵義

張慶全東鄉團倉石左鐵矢坳人本苗族乙卯之變東南鄉苗起應清平縣之凱塘苗張堅不從後勢莫敵張集苗抗之未叛者紮營於重安之大石板以自衛同治七年川軍至帶各苗抗投誠唐鄂帥炯兵至山凱失利被圍慶全率團陷陣救出背負炯行十餘里後保都司子定國興禮均年八九十興禮今尚在每於苗人蠢動均與官兵出力

羅某子占元今羅逆應榜之祖也乙卯之變苗人蠢動各鄉抗民抗不與之及城陷各抗民結營自衛羅居南鄉抗民頗眾

因聯合各寨矢與共守逆苗為難羅與戰爭多所殺傷及官軍至羅先投誠後子占元及各孫皆襲其名得官紳青盼廖國輔子春山孫啟泰啟榮楓香寨之抗家也兩州之失廖等結合同族苦守十數年蓋各抗民多習拳棍時未有槍逆苗每與鬪輒敗傷廖等因得無傷至川軍來方得投誠子春山常將屢世苗叛所得之令箭投誠護牌與城紳看今子孫不以其事報告多逸之然其抗苗之力誠難泯也

龔得勝北四區岑台寺人乙卯之亂在本境帶團丁徧出殺匪匪極畏之李都司春華帶兵練紫太陽堡常得其力深器之都司死為何選士用在本地立功績甚多得保五品藍翎田興恕帶鎮守兵上疑其跋扈欲殺之以理說脫田更重之亂

### 黃平縣志

卷十五 勇烈

三十一

定後由遵義回為川軍嚮導多所殺敵同治末年尚在地方辦團乃終於家

汪某北四區之汪家橋人兩城陷後教匪四起汪結團數十家營於寨後高榜田與匪為難六七年無一救援始潰散

席寶田事詳名宦

唐炯事詳名宦

劉鶴齡事詳名宦

鄧錡字伯平湖南淑浦人與劉提督同鄉川軍之到貴州唐炯立為安定營劉提督營名果毅錡則領果毅中營及後營副於鶴齡鶴齡克東區各寨錡皆與有功績入黔時尚為同知因黔之功薦陞道員



按綺平越州志作琦今從成山老人年譜內更正

劉德順號崑山州屬東區通巖堡人記名提督軍門賞穿黃馬褂瑚琮阿巴圖魯唐軍入州時劉在部下帶安定某營時為參將平苗最有功績

劉舜祥號福亭亦通巖堡人與唐軍來為某營首領平定苗匪最有功績後官四川管帶安定營以副將補用

于德楷號仲芳貴陽府人唐軍到州于以同知領安定前營與鄧觀察綺陳提督希祥等勦撫東區苗寨所至有功爭先勇戰不亞劉提督鶴齡後以道員留川光緒初年回籍在省辦團最有聲名其他功績省志中必為採取此記其有功於州屬者

### 黃平縣志

#### 卷十五 勇烈

三十二

安定營之將領難為採輯即劉崑山二人其子孫微弱不知先人之事故無可以詳錄他人有知可以補入

張宗澤本城人人稱土地二爺者乙卯之亂張外逃常在各營當兵每告奮勇出劫匪營屢奏奇功嘗言某夜與某三人出劫賊營路由橋過賊數十燃火橋首尾為燎望夜深賊各睡去脚各向火三人銜杖次第將各匪刀矛檢出分兩面排刀斫之賊在夢中頭顱已去三人將伏路匪殺絕馳入營中無有知者營遂亂其生平膽勇若此光緒戊戌秋清平乾豆拱苗匪楊洪章作亂九月二十日夜來撲州城宗澤適當黃平營隊目都司嚴忠培各發藥彈三份宗澤與趙蘭廷羅貴山三人在鼓角梅花處當賊衝槍彈放完各撤城垣石擊匪多

中傷之賊始去

唐太興思南人在州小資本貿易戊戌之役楊洪章糾數百人來撲城唐當衝處衆有退者唐獨不去賊由梯上益殺益來唐獨一手乃以矛腳拗城石用肩肩矛石猛下將梯打斷賊無緣上始各奔潰援兵至城得以全

羅金山名德芳城北窩田人與堂兄羅甫臣常在唐營安定營紮重安江羅弟兄屢出殺賊常立功績兩人均高五尺五六能持長矛賊當之無不披靡金山嘗言一日約五人告奮勇來劫新州賊營時新州立營三一行宮坡一聖廟後一玉皇閣上城之南門堵以亂石無由入乃由缺處穴入至聖廟之營腳又迴環不得入聞鷄已亂鳴共坐俟旋天欲曙一苗婦

黃平縣志

卷十五 勇烈

三十三

啟門抬水某等隨之入正欲動間而未入者鳴一槍將抬水苗婦統斃營中驚起只得乘而殺之苗大亂起出四奔旋天大明營內苗及行宮坡兩營見止五六人各包繞來捉某等且戰且走至折桂橋重安之援軍齊出號聲鳴苗衆始潰奔金山勇而且誠唐炯甚愛之及在滇辦礦猶呼去予以事丁酉秋回州省墓死於家金山在川帶一哨得保藍翎守備與苗里周春山隊長最相契<sub>人二</sub>

王德元西鄉朗城泥巴寨人在鄉辦團最能任事各花戶甚愛之戊戌之役王帶團入城守捉賊出力頗多凡有警官紳召之王立至其勇於任事多如此今已八十移入城中團務交之他人

解德陞直隸河間人性鷙直由兵士升任隊官民國元年一月  
即辛亥十二月十九夜南鄉金竹寨羅逆應榜借滅公口帶  
數千人忽來撲城德陞帶百人由首請領軍火去黎平交艾  
管帶夜宿城城中知羅至官紳同留守城德陞九之夜半賊  
入西門牛場街火起德陞領各兵在武廟大街及行宮坡各  
處力戰銃死苗犴無算天明苗逆始退德陞起行至東坡宋  
士豪等邀轉之二十一日至城復擊退入城各苗城得保全  
州人感之湊數千金相謝並他牛酒留月餘及返黎平其長  
官以失期囚之州人請官廳行文至乃免後又在首遇事州  
人為之上稟求救並湊金予之今已十年城中猶念解隊官  
不置

黃平縣志

卷十五 勇烈

三十四

李承勳號彥材佐臣都司之次子也光緒末年各州牧委充東  
區區長頗得苗人心辛亥之變苗犴城承勳由下水關奔  
出未叛各苗趨迎之承勳欲往黃平各苗不肯共昇至東鄉  
新莊寨中各苗趨問之恐羅逆敗後大軍來而皂白不分咸  
共問計因導之曰欲避此惟齊殺逆苗不惟免禍且有功諸  
苗允之聚者千人而東區之首及道路堡屯軍悉至各有軍  
器承勳遂在新莊誓師各以白布束肩為號且曰與諸叛者  
挂孝也領眾出至尖山坡時二十一晨圍城之苗正至新莊  
圍忽至截殺數十人東坡兵更至賊乃奔後復領眾清理南  
鄉此次之役論者謂承勳得在東鄉故使東方之苗不變且  
利用之備以出力實有功於桑梓不少七年秋病卒

唐朝欽號子敬州增生在印地霸辦團疾惡如仇每得盜匪特殺之州牧等教以格斃報唐曰明明殺耳何以如是唐任事匪多遠颺然唐之入城及他往飄忽無常亦恐匪人暗算也去年移入舊城至冬病卒年來北方匪患大熾多惜唐之未得終於任事且又死也

周聘侯逸其名貴陽人充某練營哨長戊戌秋乾豆拱楊洪章等亂作李州牧應華飛書告急鎮遠岑軍門檄周與楊某領兩哨人來九月二十夜賊糾百餘人來撲城從者數千以觀機勢四鼓賊由鼓角梅花處緣梯洶入各鄉兵相持移時周在北西兩門次第集兵至猛擊退賊天曙路徑分明周思帶兵出追時都司嚴忠培嚴鎖城門不許人開周憤極從城垣

黃平縣志

卷十五

勇烈

三十五

上躍出各兵從之追賊至胡家苑獲匪甚多槍傷無算二十一二日鄉團搜山獲傷匪解城羣苗由是解散官紳具狀以上各軍帥甚重之

田忠國北二區田家寨人乳名老炳年十六七被匪來脇兵役往捕之遂入匪隊四出擄掠兵莫與敵官廳患之民國八年夏具願投誠縣長陳及各紳悉允之忠國帶百人來就撫因為之改今名蓋望其盡忠於國也當甫就撫時陳縣長命捕某匪忠國領部下夜至某林不知匪在林下也取火吸烟匪由林下放一彈遂命息火率部兵悄至林下號起眾槍齊鳴匪放槍後不聞聲息謂無他也殊眾至槍彈齊發爭惶奔潰擄得之物及器械均驚失並獲數匪至城斬之忠國投時僅

二十一二喜立功以贖前愆每輕出遇匪輒打官紳戒之不以為意至冬戀其妾石氏在金坑場左石松山家往視之只帶二人騎一騎入夜賊偵知之忽來數十人圍執而去槍於野匪風遂熾縣人惜之

以上三十人或為州人或為遠來軍帥及武士兵弁均為地方殺賊立功雖不致於殺身成仁然而克敵止亂如李吳各公之奮不顧身其不至於粉骨壘身亦天幸也乃苗亂二十二年兩城之陷於荆棘者十五六載州人之以武功致顯者從副參游以至千百把總總以百計而黔中之優賞者為黃馬褂四除兩件由川楚軍帥得去外其兩件均東鄉之遵路通巖兩堡人得之功烈之偉洵非他縣所及茲於雲散風流之

黃平縣志

卷十五 勇烈

餘得此三十許人合之死節諸公亦未滿百人焉其遺亡者豈可勝道獨是國家之需材孔急文治與武勇並重况今列邦圖強尤以鐵血主義軍國民政策為保族保種之大計縣人知此亦可奮然起矣所有失城被難諸人及各團勇之入鄉捕賊不幸反為賊殺此與奮然直前與匪交鋒者有何辨因悉附諸殉難表中俾亦有所考核云

附錄失城殉難士民及被匪殺斃兵士表 婦女殉難附列  
志貞烈目

周延年 號壽峯歲貢丙辰失城殉難年七十餘 王自申 世襲某職雙目失明丙辰失城殉難年七

十餘 張星燧 重安土吏目失城殉難

張嘉昇 石笋溝失營殉難 王培鈺 號琢章歲貢生失城殉難年六十餘

徐步瀛 號仙洲州庠生失城殉難 涂慰昌 州武庠失城殉難

彭朝梁 州武庫失

劉啟泰 州吏員失城

周紱傳 號方來失城殉

聞人觀光 州庫生失

周珍傳 州庫生年八

曠元勳 號松雲州庫

王京 州庫生失

吳德樞 號拱長州庫

周端 號旭初丙辰城

許老關 營百總死

張嘉瑜 巖鶯七人移

劉執中 丙辰城陷與子祖

劉祖培

劉祖芳

王家棟 黃猴堡人

周家鎰 劉家苑人偕婦

周家瑞 城陷及妻

周爽 城鄉約城陷

王培金 城陷及弟培昆

王培昆 前見

王德茂 西門保正

張奇峯 州代書城

黃平縣志

卷十五 勇烈

李明

呂芳

李玉

華奉

張揚保 以上五人均州廳

李開春 遵路堡人城陷被難後

張玉堂

張德聰

張德懋

張德忠 四人均北三區墮坪人

韓連科

韓明書

譚裕昆

譚祖佑

夏老王 以上五人均州署

尹朝清 驛書城

李義士 學書城

王奉 馬兵

陳運貴 鄉約

周銀壽 老耆

韓文彬 榔木

潘奉 學署門子合上各

周家卿

郭如松

周家銘

朱翠菴

郭世錦

王雙寶

周家銳

韓明彰

周家銑

傅啟發

劉二岩

朱啟龍

郭士珍

陳三駝

陳輝發

張啟欣

以上一十七人均城內人民失城殉難者

芳圓

善化寺僧

芳欽

善化寺僧

聖錚

善化寺僧

聖回

善化寺僧

明玉

龍王廟僧

真誠

龍王廟僧

黃平縣志

卷十五 勇烈

綸滙

關廟僧

老聶

關廟住持

源亨

壽佛寺僧

游大漢

壽佛寺住持

聯法

九子廟尼僧

洪惠

道真

治和

以上三人俱玉皇閣僧合前各僧均城陷殉難者

方林

悟靜

悟心

以上三人均白衣閣僧尼

源順

城隍廟僧

許文科

重安江人避城遇難

劉禮和

甕谷隴人避城遇難

時德政

皎沙人避居獨山州城失與妻趙氏均殉難

陳樹滋

江西人苗匪劫老李壩陳義泰即其家也後在舊城殉難

馮尚忠

固圍堡團兵送公文至陰陽壘被匪關羊死

向永規

通巖堡花戶出寨堵匪被槍死

秦國泰

同向永規被槍死

戴錫賓

野洞場人同州牧盧公至渡橋捉匪被同夥滑機槍亡

周培芝

團防兵

李伯洲

團防兵

吳老黨 團防兵

唐炳奎 團防兵

周瑞廷 團防兵

龍定國 團防兵

馬文彬 團防兵

王樹道 團防兵

夏德元 團防兵以上九人均民國六七八年出差緝匪反為所殺者

韓漢宗 邑庠生入孝友傳辛亥冬出城遇害

解建勳 邑庠生辛亥冬出城被殺

彭興順

解甫臣

蔡良臣

楊長壽

黃銀壽

石雙臣 合上八人均辛亥冬羅匪入城之殉難者

羅匪入城共死四十餘人今記入人其未知者付之闕如

黃平縣志

卷十五 勇烈



忠義

舊志謂孝友睦婣任恤莫非義之當然竊以為忠亦義之當然子輿氏不云乎未有義而後其君者也今以忠為對於國家對於地方對於朋友如中心為忠為人謀而不忠之類則又義務之通詞也古謂士曰忠義蓋亦知有殊途同歸兩美必合之道州地之先民可作雖用財用力不同盡職盡心各異要皆義有所取勵澳忍而挽澆薄合璧遺絢應採輯焉增按舊志編曰尚義蓋以族婣荷其周卹里黨薰其善良為足多也乃今將忠孝一目剖為勇烈孝友兩傳如李關保之盡忠於主臨難救孤有程嬰杵臼之風吳太謙之引女投誠廖輔國之窮守不變人知大義心明順逆是皆不可以無紀故

黃平縣志

卷十五 忠義

四十

易此目續加後賢庶幾無美不搜士無遺憾者也

朱芳興隆人性端重好學少聘趙氏女以痘損目而麻女父請辭婚芳曰娶妻不以色我不娶女將何歸卒娶之禮愛無失人服其厚後以歲貢官劉陽主簿子璣有傳

按朱氏父子皆以明經服官例當入學行傳然使紳士皆入學行而尚義但錄閣左任恤之事則人之視尚義輕矣故首列二公所以重尚義也且使知門以事分非有軒輊也

田湛興隆人百戶勝之孫浩之弟嘉靖中以黃平各司民移差之累負本奏辦下川貴兩省會勘衛人義之祀孝義祠金世寶衛人先是田湛以移差奏辦事下川貴會勘仍未畫一嘉靖末世寶具本復奏仍下兩省經平越經歷李勘詳撫按

批定害乃絕衛人義之與湛俱祀孝義祠今亦附鄉賢之列矣惜此經歷者舊碑稱其不為感怵不為利移後以各司去蜀遠擢重慶通判駐鎮黃平督糧馬事迹甚著而不載其名無由列之名宦也

朱璣芳之子先以文學高等久次當歲貢讓年長者司衡義之旋以選貢授四川鹽亭知縣子應旌入鄉賢傳

彭亨衢其先江西人客遊于州遂家焉勤儉好禮與人交絲粟不苟遇勸糶修橋輒踴躍為眾先

朱堂本所舍人性慤誠而篤于孝友足跡不到公門一鄉稱善人院道旌以華楔

陳智州人性和厚勤儉而好施葬行旅掩暴骨病餒者解衣

### 黃平縣志

#### 卷十五 忠義

四十一

推食濟以藥餌隨時行善至老不倦子正心入忠孝傳本志載勇烈

游應鯉州人少讀書試未售即務農業謹身守法延師教子多行陰德遇人亦諄諄勸勉焉天啟末年八十公舉鄉飲耆賓張國緒本所人幼讀書長為州掾以廉直不合于官遂棄之延禮名師以課子孫子大維大綸孫拱北入學行傳

王家棟字元石榮三十一世孫父祖堯襲千戶家棟貌魁梧輕財好俠尤長于技勇崇禎中間西北多故慨然謂世職不足建白遂杖策投軍後聞黔中有苗患復辭歸宗族多賴保護佐從叔宗周于保定為歸迎其父母未行而宗周以憂去時楚豫盜猖獗不能歸服闋補金谿令旋罷會甲申改步音耗

阻不知宗周存亡棟乃犯難走吳中尋之遇昌平牧張問德  
避亂維陽為悍僕所窘棟憤擊之羣僕獸散後歸里有不平  
事輒為排解莫敢齟齬年八十六卒子椿枚某亦慷慨好義  
云

王家紳榮三之裔崇禎中黑苗圍衛城張緯南田惟貢請救鎮  
遠半道遇害不得達人莫敢復往家紳負技勇而行捷慨然  
請行遇苗截路家紳接其槍隨手仆數人奪路去苗追不能  
及乃得董司馬邦昌龔參戎應龍提兵救援城賴以全  
以上十一人均明人舊志載諸尚義傳中者

戴貴龍字君輔蜀長壽人少孤力學家素裕年十五值獻賊茶  
蜀因囊金偕健僕遠避至黃娶於趙而家於城北葛浪鄉時

### 黃平縣志

#### 卷十五 忠義

四十二

丁未造賦役煩興居者逃亡過半貴龍惻然出橐金代納民  
稍復業暇即讀書耕稼明大義趙亦稱賢淑善持家家漸饒  
輒賙卹貧乏適遭藍二之變村人凶懼欲逃貴龍盡傾所有  
與同村劉姓募勇士為守禦計寇不能犯村中二百餘戶賴  
以全活皆尸祝之貴龍無德色既去蜀值家忌輒西望號泣  
每數年一首祖墓率以為常其至性如此晚年隱居課子嘗  
訓子曰居家惟積善可以垂久前人積善譬之焚膏後人益  
之則膏沃而光暉也子天祿天祥天祐俱有聲庠序孫八人  
有名士風時稱八士琪成進士以珣貴貶贈文林郎劉名以  
敬孫世燾亦成進士人以為厚德之報云

王宗禹字疏河父民牧卒於雲南通判官舍囊無餘資宗禹往

返徒跣扶櫬歸賻遺無所受崇禎末避地蒙加苗民貧乏恒假貸之畧不能償者輒還其券其好義如此丁世亂雖才富學優深自韜晦奉母教子以布衣終子賜纓州庠生朱如旭州人應旌六世孫高祖表官鶴慶經歷曾祖朝岳以歲貢為寶應教諭祖師周入文學傳父輅歲貢如旭字東昇號燦齋生平孝義事詳沈學士德潛所作傳中傳載藝文以子定元貴封通奉大夫

張于麟字友鳳父謹早卒舅奪母志伯父諭撫以居時有七歲諭誕其產欲死之者數矣會有天幸輒為戚隣所救少長贅庠生李傑女且學且習儉以勤家漸裕有子八長者教之耕少者教之讀歲時祭祀常以不逮養為恨命諸子曰汝等不

黃平縣志

卷十五 忠義

四十三

及事祖父母見伯祖父母猶祖父母也時諭家已落迎養之族從兄弟居遠鄉來州應試或府試院試過州城必助以衣物資芥年五十三卒以五子梓官贈儒林郎有傳載宦蹟黃國任康熙間庠生有芥菜塲田田隣以水坵占墾佃戶請訟理置勿論常晝寢庭中囊金為人竊去見者以告恐其人羞辱忍不言喜矚人貧困貸不能償者即焚其券曰無使子孫索取傷舊好也子維瓚增廣生性寬讓人有凌侮輒避之絕跡城市于橋梁道路則傾囊補修佃戶分穀多寡聽其自致或言侵隱曰彼勞我逸雖少隱不足較也維瓚子閣才庠生恭遜好義所積仍為修橋濟荒之用妻宋氏施秉宦家女父母貧老贈三百金買田以終其養捐所典白旗屯田數處價

九十餘作魁閣焚獻資有楊光祖妻向氏閤才友人女也夫死子幼分宅居而饒之

李承運子若珊若珍俱好善修輿勝橋行人使之

張兆先字孚周州庠生順事父母偶不悅即長跪請罪與兄兆興相友愛兄出繼伯父產薄兆先仍析父產讓之少時值亂逃散與祖母范氏相失父紀求不得終身戚戚父卒兆先徒步走數郡旦則逢人拜問夕宿神祠泣禱屢年始得之石阡張宅迎歸與兄孝養焉子國玠增生國瑾庠生

王上士字雁階孝友好義李通政臺有傳載藝文孝廉孚正其次子也

韓代開字運遠州北長嶺人八齡失怙事母順養敬兄愛弟出

### 黃平縣志

#### 卷十五 忠義

四十四

于天性及長處鄉黨無欺誑而藹然可親持家勤儉然能同人緩急族黨多被其德乾隆初兩舉鄉飲大賓年八十餘卒郭起賢字士希州人幼讀書試不售年三十六為本州戶曹掾勤慎無害雍正乙卯逆苗猖獗勢且近起賢先命門生汪清收合州魚鱗冊擔負藏龍溪石巖署州事麻哈牧羅度孤城難守矢身殉以兩州印付賢貴首城陷羅殉起賢欲從死念州印無可托持之夜行避江外比亂定金千總升先突圍請救道病後以失守議斬起賢出州印推護持功讓之得免人服其義復為曹掾時流散歸業田畝錢糧多影射爭構賴魚鱗冊存點者無可售欺人咸德之先是田賦推同甲一人為戶首復督以糧差起賢知戶首為累請去之惟慎擇糧差累

釋而逋欠益鮮閭里稱便次子綸字承恩中丁卯科武舉  
林春元明經鳳來之孫世業儒性行醇篤少孤食貧習醫諸內  
經之旨數起危疾遇時疫全活尤多貧者率不取酬選充醫  
學家漸裕雍正乙卯苗變後遺骸載道春元躬檢葬無勞惡  
之色食用裁足恒自損以給人貧而病者為處方購藥死者  
助之棺歛州牧獎以額曰樂善好施年八十二無疾卒子廷  
桂能繼其志孫開泰以文學有聲庠序間食廩餼

聞繁昌字茂宗其先山陰人祖睿卿順治間官新添守備與興  
隆衛守備秦傑同鄉戚好睿卿移官岳州適裁衛遂俱留家  
黃平次子鳴鳳生茂宗由行伍為施黃把總雍正十三年帶  
兵征台拱叙功一等以疾卒伯父鳴鶴老病無子茂宗奉養

### 黃平縣志

卷十五 忠義

四十五

調治如其親人以孝義稱長子瑗以父廕為國子生四子瑤  
早歿婦郭氏見節孝傳六子友蘭以嘉慶元年引年 恩後  
從九品銜

張希泌院吏員慷慨好義值凶年買麥種給隣里播種人皆德  
之苗變後骸骨遍野希泌捐資負人檢瘞號萬人墳後日久  
踐踏幾平子庠生起芝起元為樹碑碣禁牧畜馬

楊會通字友儒少讀書屢試不售去為藩司掾性勤敏熟于掌  
故一時稱諳練者皆莫之及乾隆二年安設各屯議以各州  
縣糧如前用兵時分運給軍黃平原運巖門丹江等處會通  
酌水陸之遠近運費之多少更定數處力請行之所在官民  
稱便而黃平遂得由水途改運鎮遠無負載奔走暴露守候

之苦仁人之言其利溥會通有焉子光廷歲貢生光廷子世珍樂善好施常與同志捐修大成殿西門橋施粥濟饑人稱其德諸孫入州庠列北雍者濟濟焉

張君義父鳳翔四川人明季為武岡知州移居黃平時未有子力施濟後生子二君義君任君義占籍以歲貢為貴定訓導踵行父志家漸貧孫存恭中康熙癸卯舉人未仕卒存恭弟之琳由行伍為丹江武弁子孫遂遷獨山云

孫億字德萬自奉淡泊儉以起家常以衣食給人與妻郭氏年皆九十子如賢如淵學淮俱庠生文士大士達士名士吉士志士杰士上士其孫也文士有傳

楊光宗字敬承州庠生孝友廉潔居宗族之長綜理家務咸信

### 黃平縣志

卷十五 忠義

四十六

從焉少時值苗叛奔避偶于路拾囊金坐待竟日無問者乃書獲金地名揭于城市有吳客來認詢其封數輕重字號皆不妄遂還之吳請分其半以謝不受州牧聞而嘉之言于學憲獎以額曰英年高義

羅嗣宣字光宗州北龍塘人增廣生好學力行從子奕俊少失怙恃嗣宣衣食教訓之後補州學生又族有浩然慧然玉然兄弟以田質金為買遷計久不歸族人議鬻其田嗣宣勿許訪之粵中三人者已死得慧然遺孫嗣揚嗣顯以歸僅六七歲撫教婚娶捐所質價以田歸之其敦于宗族如此年七十卒子奕彬奕彩文表俱庠生

戴文郁捐貢生稟性誠樸好善樂施捐資倡修文昌宮又造舊

龍場石橋每遇道途傾側捐資修治荒年出穀以賑貧乏有  
七子皆能繼其家

羅聯章字錦如州東門人遷居葛浪洞先是值歲稔父母失其  
舊業聯章甫八歲攜之依舅氏唐家少長負販四方躬儉薄  
而豐于養不使父母以貧乏為憂親歿盡哀禮後家稍裕喜  
助義舉濟急難有牧馬人驅其馬墮坑谷中逆旅主人責使  
鬻身以償聯章止之見鬻女償債者代償焉遇歲稔為粥賑  
饑以百金置義田濟族之貧困然常汲汲若不慊于志愛讀  
書少以貧廢儒業晚年為子元吉孫士英納粟助軍興皆授  
九品職延師課讀孫士珍補博士弟子員諸孫十餘人皆習  
科舉業元吉能承其志助修 文廟書院平龍福眾等橋歲

黃平縣志

卷十五 忠義

四十七

荒賑貧困如父在時云

楊秀璠舊州寨畢人少以二親老病甘旨藥餌費不貲家日落  
親卒既葬遂移居都凹山耕山種靛勤苦之積歲可數十金  
施與輒去其半生一子數歲而殤為善不懈妻勸其娶妾曰  
吾命宜子則爾年未衰若無子何必誤人家少女既而妻伺  
其他往為娶妾巴氏強納之生子再德再德未生時鄉人修  
西門橋祈嗣者約共修七硿之一名曰廣嗣秀璠署捐若干  
傾囊不足自荷鋤負擔計工以足之常日手一鋤遇道路崎  
嶇傾卸者修復之行他人田塍間有禾穗偃地必扶理之有  
田歉於水水必由高田以入田主怠不首而下田復私決以  
自利秀璠日夕守視常使高下田與己田均足人服其量凶



年饑者粥凍者衣路死者收瘞雖典質稱貸為之不吝年七十四卒子再德孫正榮皆能業其家妻朱妾巴子婦吳皆有節行具列女志中

郭於忠性孝友衣食僅足而好施與歲購棺十餘具以濟不能葬者道路橋梁無不竭力捐修州人高其義請於州牧鄔表其宅曰里開完人鄉里稱郭善人云

彭起珣幼讀書不成以惜字紙為務日攜一袋城鄉書館無不遍歷收焚而藏之銅釘山巔或靖黎洞四十年不輟後有蕭仲舉亦如之仲舉不知書而好言陰騭果報遍收字紙於朔望日詣靖黎洞具香楮焚化藏之至老不倦

王緝字方來州庠生明千戶政輔裔孫也祖朝縉諸父成章

### 黃平縣志

卷十五 忠義

四十八

成卿俱庠生皆有隱德以耕讀世其家緝秉性醇樸制行端方乾隆庚寅己亥丁未等歲饑施米施粥全活無算助捐銀一百二十兩修平龍橋與兄暨子姪等捐千金建文昌閣培地脉為課讀所以長子庭炬官廸封登仕郎年八十餘卒次子國泰辛卯武舉庭炬字絜齋州學生屢試不售捐府知事分發江蘇署金匱典史旋補蘇州府知事以目疾告歸庭炬長身玉立奉職勤慎上游多器重之居官未久人咸惋惜子玉麟庠生國泰子瑞麟亦庠生

俞學深原籍山陰人祖英基父鏡世守忠厚以醫理傳家深醇謹力學屢試未售而持己敦倫濟人利物里黨稱良士訓子孫以儒兼醫自經義及歧黃書皆手錄使誦習為人治療輒

效未嘗索酬人以仁心仁術推之卒年七十子嘉謀 恩貢  
生嘉會庠生餘俱業儒

王國偉州北干屯人性孝友有二弟早卒撫其遺孤如己子既  
而妻卒人勸之續娶曰吾姪與兒尚幼倘娶而不賢奈何俄  
而子瑗歿勸者曰今則不可止矣嘆曰弟之子猶子也昔慮  
娶不賢苦吾兒今獨不慮苦吾姪乎及兩姪珣瑛已長受室  
不忍伯之嗣勸之娶亦不從珣瑛乃偽為自疎遠者求析居  
有疾不問召之亦不至而使前勸者復言曰君謂姪猶子今  
若是幸尚未老曷娶乎乃許之及娶夏氏珣瑛復親近如初  
後生子星等三人與瑛皆習儒業而珣以學行稱庠序今為  
歲貢生人交美之

黃平縣志

卷十五 忠義

四十九

劉漢芳字廷祥性豪邁好施與凡地方修築公舉關於利濟者  
率身任不辭族隣有貧乏多方賑濟必視其得所而後已尤  
直質尚義不可干以私以故忿爭者成就決白莫不忻然聽  
受解釋而去其枉詐者不敢見也先是世居湖南之茶陵父  
祚慧携長子商於蜀及歸而長子猶留蜀祚慧日夜念之時  
漢芳甫成童見父之思兄切也不遠數千里徒步尋之終得  
其兄以歸己乃學負販于黃平以其贏歸奉甘旨父卒殯葬  
如禮迎母就養遂家焉以急公授從九品職娶朱氏生二子  
奇揚奇萬先後捷武科奇揚効職兵曹邀 覃恩封兩代宣

武都尉

楊兆龍州人敦倫紀凡有善事率先爭赴人以孝義稱之子世

魁歲貢生

劉作德字濟川湖南茶陵人性端重和厚少時父祚典為商黔中徒步尋之父命以就學既而父貲中落乃負販以代其勞貲復起遂迎母來黔以兩親久勞于家計思得其歡凡施予賑貸倡修橋梁諸義舉皆竭力為之曰吾親之志也扶持宗人多方訓迪期于成立鄉隣雀角得一言輒解人咸重之以急公授從九品職年六十卒子五人奇相士璋及孫發裕發淳皆有聲庠序發源候選從九品

劉琬西名廷炎以字行先為江西廬陵人天性孝友少讀書應童子試不利去而懋遷所得悉以資親族之貧乏者尤勇於為善與族兄漢芳濟川募修西門橋又捐修翁埋波洞二橋

黃平縣志

卷十五 忠義

五十

工稱穩固其助袁公治修平龍丁未橋力尤多又佐理 聖廟書院及 文昌魁星諸閣庀材鳩工不辭勞瘁他如施秉之雲臺山諸葛洞亦捐多金施人敦請以主其事庚寅戊戌年荒施粥皆勉力從事凡有興作州人咸推為首琬西寢食工所綜理微密絲毫不苟人以是重之其樂善不倦類如此教諸姪勤懇周摯咸使成立尤人所難及云以急公授從九品職子三士程士徐士印

董敦禮字文敬祖再舒廩膳生父治庠生屢世忠厚敦禮性剛直平易初為布政司掾以謹信特見倚重歲滿循例捐吏目職棟發浙省歷署州縣倅皆能其官題補定海分司月餘丁內艱服闋以前試俸未滿仍赴浙借補慶元尉在官七年奉

委詞訟率平情處分無不服者尤體恤獄囚邑中橋梁道路捐俸倡修以老歸士民祖道不忍別先是母白氏卒敦禮甫六歲繼母陳撫之奉事五十餘年愛敬篤摯父母俱以恩貶贈既歸以本族居遠更立祠祀其祖父而大宗祠堂歲必與祭祖塋凡數所每春遣子弟分往拜掃而同上一塚週而復始事足為追遠法又捐金倡殷實者買田取租以應合村夫馬之役急公厚隣人皆稱之橋渡亦多捐助修村旁翠屏山寺雖晚年遊息所實為族里誦讀地有二子早卒課孫曾至老不倦今年八十餘矣

李迎春其先湖南人洪武中始祖章從軍來黔以功為偏橋衛百戶五世至時芳官四川黔江知縣又五世至迎春勤儉樂

### 黃平縣志

#### 卷十五 忠義

五十一

善雖力農而能重學子三人繩武世熊及孫德浩德瀚皆入施秉庠

張映奎字會文州人入獨山庠為歲貢生勤學敦行施與不吝於板橋橫嶺建涼亭置田為施茶費子上典上仁上禮上智葉盛字向榮父文尚有好善稱盛敦行父志乾隆壬子年捐修鼓臺山下萬福橋約費百金賑饑埋骨排難解紛事不勝紀子燦鰲庠生

曹汪字大川掄傑子州學生性孝友年十一喪母哀毀如成人兩事繼母皆稱克順至六十餘始居父喪食粥茹蔬不以老自寬假與諸弟友愛無間生平助人娶葬為人贖子凶歲濟饑乏一踵父行以引年恩授九品職銜年七十四卒子

毓鍾庠生毓棚監生毓椽庠生毓樞業儒

曹 泉字濬川掄傑次子七歲失恃及長為國子監生善事繼母恭兄友弟仗義疎財年四十餘卒子三毓榮毓楓毓泰俱庠生

張朝棟字雲表子麟三子有才諳年十三即助父理家政雖貧奉養甘旨無缺俾兄弟七人名就其業後稍裕助貧困賑孤弱殷如也卒年五十七子五大呂武舉大惠庠生大藩國學生孫十餘人啟榮庠生啟華監生餘載大觀傳

張大觀字用賓朝棟四子少業儒試不售去為醫治療不擇貧富効未嘗索酬年饑施粥及掩骼埋胔善事不一子二鑑廩貢官鎮遠黎平府學訓導啟鏜監生

黃平縣志

卷十五 忠義

五十二

張 銳字爾覲父汝翼早逝撫於祖母狄氏性樸直篤愛同氣與兄錦鏜事祖母均以孝稱存心利濟鄉里有爭訟力為排解地方公事則出力任勞一秉公正平恕不避嫌怨兄弟年老未嘗析居尤人所難及子世正世任俱庠生

周杰世字邦傑學瀚子性耿介寡言笑於人鮮所合於事少所可然遇公正事輒以身自任早失怙恃讀蓼莪諸什不禁涕零值忌祭縞素蔬食誕日亦如之終其身不受慶居家戒奢靡禁繁華尺布斗粟不忍浪費至於裏人之美傾囊不吝婚葬兩事尤惟應之有言必踐無事不誠終其身如一日老年喜靜攝朔旦不葷不酒閒時步庭階澆竹鋤花以博逸趣以無疾終先期沐髮浴身衣冠端坐而逝年六十有八子卜年

登乾隆庚子科賢書鶴年業儒

李必榮性純篤十歲生母丁氏卒哀毀骨立如成人禮事繼母周孝養愈篤父澄不善治生家中落兄亦負債累累必榮力學不獲售遂棄卷經營有所得悉為父兄償逋欠又為弟必茂捐貲入藩司掾父母昆弟稱其孝友鄉里亦無異言

賈士鵬舊州北浪洞人少孝友嘗入山採薪遇虎虎反避去父母卒自謂家累少而年力方強以腴產讓二兄自受荒瘠種植茶杉以億計十餘年漸饒樂善好施刊善言善事以勸人兄卒助其喪葬勉兄子斌就學以貢生選銅仁府訓導傾囊助之修理舊城文廟前二坊州有烟戶役頗重力請於官得減其半隣家火及宅而熄人以為神佑今年八十餘子長

黃平縣志

卷十五 忠義

五十三

璧監生次思達庠生

張秦州庠生樂善好施世居巖鶯壘襲土司秦以兄卒姪幼嘗攝其事撫愛諸苗皆奉公少訟村旁有大溪人頗病涉捐貲建安瀾橋周孝廉錦世為作記年四十餘卒子若淵州庠生

葉藩字為翰秉性醇厚六歲受書已能解大義家貧不能卒業隨父學藝母楊氏久病刲臂療之稍瘥逾一年母卒哀毀骨立父老弟幼獨肩事畜以己學未能成遣弟秦就從兄秀學每夜必執藝伴之讀弟後補弟子員事繼母劉氏問寢視膳慰志承顏無異所生父喜飲雖貧日必奉百餘錢具酒膳父卒繼母所生弟章教育婚配數年未生子又為買妾兄弟

同居孝友之實雖書傳所載不能過也

陳紹文字光輝少為州吏歲滿家居博覽羣書不涉外事樂善好施凡修橋路及荒年施粥不惜多金州人咸重之生二子斌士達士俱成名年八十有五矣

陳懿德江西清江人占籍黃平為國學生助修舊州學宮魁閣星山書院及西門平龍等橋凡二百五十金遇歉歲常賑困乏造回生丸以濟時疫及掩骼埋胔修路等事義舉甚多一置祭田以祀其先子四長遠修捐貢次遠彪庠生杜之麟江西人孝友裋躬端嚴訓後因省親來黃遂家焉積而能散崇修禮門建橋施粥善行不一其同祖兄弟課讀婚配悉敦友愛年七十子八人半列庠序

### 黃平縣志

#### 卷十五 忠義

五十四

戴德桂武庠生性孝友父深仁患麻木症十餘年發輒一二日不能動履舉止需人母亦體弱多病桂於父行止必隨扶持必謹侍母病衣不解帶一日以母病不敢離而父往平溪未歸距家十餘里夜間父病復發即趨往視時適溪水泛漲弱於溪順流里許忽得攀木而登人以為孝感父母卒哀毀氣絕者數殯葬後遂得疾不起

范 樞性勤儉家以裕足而隣里半貧乏樞無不謙遜謹飭人咸稱之子二長文秀施秉庠生

許世懋字德卿其初祖多吉以功授明威將軍曾祖乘鳳以應貢承世職祖振玉父銓皆州庠生世懋安分謹行躬約不苟母病刲臂療愈處兄弟友愛不爭子其瑗其璋其瑛其珍其

瑤

胡文林國學生處士子賢之子自豫章而家黃平母許氏孝且慈幼時每夜課讀必訓以大義及林長敦厚種德篤敬 聖人學宮龍脉踐踏願捐金助衆補之凡寺觀礮梁遇有修造罔不樂輸長子京兆庠生次子麟兆三子祥兆俱業儒論曰周禮以鄉三物教萬民而賓興之其一曰六行孝友睦睦任恤是也茲于孝行特著者既入于忠孝之篇其下五事往往出自士大夫學行宦蹟傳中章章可考矣然或學與宦無事可稽而即高義之一端足以想其為人則亦列之尚義焉夫人之為善豈必求福然前明達官世職蓋以十數其子孫濟美固不乏人而零落者十且四五可嘆也乃朱芳起卑

黃平縣志

卷十五 忠義

五十五

官後遂日大陳智張國緒諸人伏處里閭之間子孫科名相望仕宦累世天道福善詎不信哉故備著之俾生閱閱者念先業之必賴增修而處寒微者知積德之無難滋大云以上五十一人均清嘉慶以前人舊志載諸尚義傳中者

王玉麟字炳書江蘇蘇州府知事廷炬子也性仁慈弱冠入武庠旋失怙以顯揚為急援例捐衛千總職請封典 恩贈兩代武略佐騎尉安人事孀母色養兼至族人賢之推為長玉麟亦以敦本自任倡建宗祠規模宏遠清復已失祖墓十有餘所閒暇校弟姪輩騎射多獲雉焉生平好義慷慨有為取與不苟然諾必信閭邑善舉恒賴其力以成若州之 文武聖宮魁星閣善化寺南鄉之文昌閣三官閣東鄉之飛雲洞



三官殿及東北道之十里橋芷隍橋其較著也任重若輕雖勞無怨勤公事無私謁邑侯咸器重之歲饑捧檄勸捐與同事輩辦賑必使人沾實惠其一切平糶常平凡有關於國計民生者靡不視為己事盡心為之今年已七十有三猶矍鑠如故斯所謂俾壽而臧者歟子兆熊州庠生兆岐應童子試孫德福德祿德三德武俱業儒

朱縞貢生巡撫定元孫知縣文彩子生仕宦後無紈袴習謹言行見人呐呐然如不出諸口而和藹之氣溢於眉宇是以人咸欽慕之尤篤孝友父令楚南桂東卒於京時縞年十有五兄續雖長而善病俱奉母家居訃至縞即匍匐奔喪往返數千里扶櫬歸營葬具必誠必信悉獨力自任兄旋卒遺女

黃平縣志

卷十五 忠義

五十六

一撫之如己出生平樂善好施肫肫以濟物利人為念夙受明人異方不惜重貲製丹丸以賑疾病投之輒效行數十年至老不倦現年七十餘子三耕讀各司其業諸孫林立一庭之內和好無間孝友可風人以為盛德所致云

以上二人為嘉慶以後之所補入尚義傳者

李關保失其姓庠生李之顛家僮也年甫十二值雍正卯苗叛之顛挈家避於老鼠關莊上莊苗引賊入之顛及父母皆被害之顛妻郭氏女二姑皆撞石死關保負之顛周歲兒元善逃免乞食哺之之顛兄煥唐以先出瞭賊得不死比亂定關保負元善歸人咸稱其忠義合詞陳請與主母郭氏及二姑並奉旌獎

以上一人為舊志載之忠孝傳者今改忠義用之編入

黃 榆號春山南區官莊霸人敦厚尚義咸豐乙卯之亂棄學業商開黃乾泰號於省城報捐從九樂施予族戚中有能商者假以資本不責息州城書院課士無款榆於光緒二十年慨然將本己之鐵廠田一百餘挑並耕牛倉房捐作膏火學人有資州牧瞿公表其門曰慷慨好義其田現為重安學校收用榆子二長品芳食餼當貢次品芬

張尚聖城東茅坡人咸豐苗叛城守乏糧慨然獻穀一倉州主義之保授從九職銜

鄧廷傑號金珊雋城北平溪場人世傳落巖鄧姓又曰鄧十萬蓋謂產業之盛也父俊臣咸豐間任粵西南寧某營遊擊同

黃平縣志

卷十五 忠義

五十七

治中黔亂漸平棄官旋里行抵羅城病沒廷傑隨母避亂者垣以姪為繼時貧甚及壬申癸酉間苗亂肅清始得還家清獲祖父產業鄧氏故富甲一州廷傑復經營之益有增益下游大姓遂無與比然廷傑雖席履豐厚毫無富家氣即昔在省貧亦無窮人氣確有端木子無詔無驕風性復和厚喜怒不形於詞色與士夫交謙退如不及與鄉黨來往善氣迎人皆多之州亂平後官紳規復舊制如 聖宮考棚新舊兩城書院兩文昌宮新州文筆塔舊城誠善堂惻隱堂南北賓興牛昌霸義渡等廷傑均出巨款以助光緒甲辰年兩城創辦高小學堂苦無教科書堂長張樞往勸捐資遂以二百餘金置書堂內當瞿州牧三履任時凡有興作廷傑出資之多

即此時也州牧義之親書匾額以風嚴範蔭督學至府聞其風亦書嘉惠士林四字予之光緒中年國帑空乏廷傑以巨資報效部覆獎以同知職銜兩州人士共往賀祝平溪男女學校久無成廷傑予以鄧氏義塾田復經營積穀乃底於成後多畢業之生實為其惠反正後四郊多故廷傑獨購槍枝募練團兵保人保己更有姪光榮相助地方乃得獲安子四長光漢先廷傑沒次光鍾後廷傑一歲沒四光□尤聰穎夏月露宿火藥側不慎於火藥然而傷殤廷傑由此鬱鬱病年餘戊午三月沒於家獲年五十有八三子光燦南明中學畢業繼辦北三區團有聲於時姪光榮武庠生另有傳

張鳴皋號朗軒經魁咸豐八年舊城失守紳民殉難極多屍骸

### 黃平縣志

#### 卷十五 忠義

五十八

填街道賊退鳴皋入城收葬數百具費資無算人多義之

楊代欽號明宣江西高安縣人光緒初年至舊城經商號名同義厚性情和厚與人無欺楊初至資猶中等未幾甲於一縣並及全省更擴充之如外省之常德漢口上海等商場無不有同義厚商牌舊城修高等小學校捐助百金反正之初公口邊起某匪垂涎城內王寶丞首倡招兵抵禦代欽首出銀千兩作兵費各商號及紳耆繼之練兵百名械精糧足匪不敢發舊城得以無事舊城設誠善堂作慈善事代欽捐銀三百兩並專函省內及各市埠托各莊友捐銀補助至今善堂猶存上塘那鮓河水當入省街道過客病涉代欽捐銀百兩為倡橋費數千金因得落成他如施秉之雙鳳橋等代欽無

不出資補助在縣五十年商業最盛名聞遠近民國六年二月卒於漢口子清淮年三十繼理號事和平好義不減父風王寶丞四川某縣人德厚榮之管事也慷慨好義遇事勇為舊城有事紳商齊集每事由王提倡咸贊成之至期王首以力楊代欽首以資故事無不舉如猴場某匪公口數百欲擄黃平商號也使人告之索償王不允乃首議招兵楊代欽以千金助之事立舉王立以號中布柵周圍號屋用代牆垣各號效之一時營壘數十柝聲相聞而又有新募兵以為策應猴場匪偵之知難與敵遂不敢犯匪息兵費不足王獨任之如修學校橋梁之類無不量力捐助王雖代人營業食用甚華然號事亦甚開展民國三四年德厚榮收黃平莊王因以去

黃平縣志

卷十五 忠義

五十九

今人念及舊城事無人不思慕寶丞不置王性情爽朗慷慨有為在舊城十餘年義舉甚多惟無筆記之者今數催索不得只好舉其大概如此

樂嘉藻號彩澄光緒癸巳恩科舉人城北黃野人咸豐乙卯之亂先人避難省城遂家焉然嘉藻與弟嘉荃均回籍試悉入州庠父某在省作商上下兩湖家至數十萬中國自甲午敗後嘉藻弟兄慨時勢日促願毀家行難念救亡需首開民智於是在省設立學校輸銀五千兩買置書籍儀器聘請日本教員以教黔中之士貴州之有學校由嘉藻起也丙申丁酉間設校於省城南門外丁文誠公祠戊戌變政中止辛丑後復設師範學校嘉藻弟兄以促進文明挽救中國為己任因

此捐資頗多大樂尤其巡撫龐公錄列具奏以揀選知縣得  
獎知府銜弟兄兩人尤關心梓里每致書士紳勸之入省留  
學如貧無資者飲食學費均予供給城中如周貢生陶在其  
校內樂弟兄貸予安家費用年耗五六十金其他各縣寒畯  
得其周濟者不少縣城初設學校未有規模凡聘師買書之  
類多得嘉藻指導宣統初黔省設諮議局選嘉藻為議員復  
由議員選為議長若鎮遠七屬同鄉會會長省教育總會會  
長者慈善會會長均舉嘉藻為之在會多所建白宣統三年  
各省志士鑒內政不綱外侮頻陵集會滬上議由各省教育  
總會選舉代表二人赴京聯名向政府請願速開國會以救  
危亡嘉藻為人望所歸被選為正代表蔡嶽副之其見重於  
時如此蔡嶽亦黃平籍人多羨羨後偕詣京伏闕陳請詔下  
減短預備立憲期四年准宣統五年召集歸未久值光復嘉  
藻居樞密院要職旋以省中多故避地京師嘉荃湖南候補  
知州運同銜國變後返居省垣不聞世事

吳泰謙東區翁開人本苗族署巖門司把總吳炳章之父也咸  
豐之亂由清平延及縣地東南區苗民已變翁開猶未與亂  
楊州牧家書中言翁開苗人至城求撫蓋泰謙也及州城陷  
泰謙得楊公女負至家撫之唐鄂帥統安定營至吳即攜女  
投之唐公兵退合家隨之入省厥後武字營來泰謙已老遂  
以子炳章為嚮導復州城炳章父子多功績因以炳章署巖  
門司事同治十一年李都司佐臣在任漏網凶苗在在聳動

炳章舉辦頗多此後文武兩署辦理苗疆各事依賴之光緒末年新政發生苗人亦漸開化炳章性情和緩未有所措然家炳章字煥堂子傳芳號蘭亭入癸巳恩庠戊戌冬補廩食餼

雷有鳴東區克麻塘人歷祖以來雖苗族頗知大義其高祖正關於雍正乙卯之叛投哈將軍麾下為鄉導亂平賜與田產永免夫役及咸豐之亂其父阿報不願為逆清平縣知縣某迂儒也自負能化愚苗乃單騎入鄉勸導至東區諸苗守之禁不得出有鳴父子百計圖之得某藏之穀倉中後漸露風苗逆難之復夤夜送至施秉縣署某乃免各苗偵知欲不相

### 黃平縣志

卷十五 忠義

三

容有鳴父子以五百金為諸苗賄疑始釋

清平志載縣官秦

韓觀察營出以

回籍當即此事至席軍上有鳴復投誠為鄉導事定獎以軍

功委署楊柳卡額外子鴻章鴻勳鴻猷孫國鈞均讀書明理

龍學海號涵川東區描龍寨人與雷有鳴為兒女姻光緒初年

與吳炳章雷有鳴齊名謂之苗疆三酋然學海尤聰敏肯任事喜交遊家中食客嘗數十尤禮士人有至其家者敬禮之不令行多方留教其子弟聞有明師不惜重資遠聘每謂人曰吾等苗族若不讀書不知天下之大每好叛變必無遺類至其家內如青烏醫藥拳術繪畫諸士無所不有當亂未平投為鄉導每獻策諸軍帥謂苗人顧家心甚兩軍久持時重購內應入焚其寨男女奔走諸苗返顧可以制矣又知苗人

之藏粟於地窖導使掘之諸苗乏食故喪敗極迅亂平委署翁蕩汎外委未幾辭職家居與吳雷兩人分任三土司事光緒七八年州署派苗夫頗重皆三土司所為龍乃赴省控訴得批示回劉州牧為之刊碑定案今縣署前之三土司夫役火煙米水花糧等章程碑是也至後苗人得減負擔並免虐待龍之力也其他軼事甚多備載寄奎軒苗疆三酋長傳光緒二十一年秋病卒子玉琨玉書玉成頗知學姪玉堂州庠生現辦團事其材不讓於伯又姪玉章玉峯多知青囊青烏之術

羅占元父某南鄉金竹寨之犂民咸豐之亂羅集犂民數千家結營自衛唐軍來首先投誠約犂民共為鄉導

### 黃平縣志

卷十五 忠義

六十二

廖國輔城東楓香寨犂民兩城失陷廖等結合犂民苦守十數年官軍來首先投誠其家尚有康熙年間之投誠令牌等公件兩人事迹並詳勇烈傳中

楊德滋號雨堂城東新莊寨之苗首也性明敏嘗在外經商多見聞其姪啟芳讀書明理辛亥冬月羅犂作亂帥眾焚城李承勳區長出城楊之叔姪挽留在家乃得糾合苗漢團丁前來復城並阻住東區一帶不生異心亂平功績頗多陸州牧為之請獎城內紳耆重其忠順不辭勞瘁多予匾額以為矜勗洪倫北二區金坑場後老蚌衝人也咸豐之亂兩城失守施秉亦陷流民無歸勗以神權法術聚各縣人民於金坑詐約叛苗往攻餘慶至者千人夜半戮之無一漏網至是歸者益

多衆至六七萬更於舊城北十里之重陽坪駐紮大營時洪倫年已七十鬚眉均白自號姜公蓋謂如周尚父也各流民重其年齒又以聶老祖祖稱之故世人少有知其名者其致流民也需謹奉其教不飲酒茹葷男女各宿老幼屯居有粟者出粟有金者出金日食所需特親手分配如甲有幾人向之索鹽隨拾一片予之恰夠其家之食有作奸犯科及男女同宿者見面輒叱飭之重則斥逐輕則罰跪以此人多神之謂其果有神也戊午冬月設壇於重陽坪上大作齋醮傳令次年三月帥衆入東鄉爭轉已失各地時有白某衆稱白三公東區臘望人也其家陷於苗寨哀求不已不得已於次年正月十二日出兵出兵前復醮於重陽坪洪倫令將槍炮焚

黃平縣志

卷十五 忠義

六三

燬謂能封賊槍砲不恃此也於是男女老少六七萬人各持刀矛犁鋤負耕牛籽種向苗寨去謂爭轉苗地即在地耕種不須還也至州城逆苗與戰烏槍遍放人果不傷苗衆大驚悉奔潰去前敵已至巖門司河洪倫帥各男女散駐於甕谷隴各寨悉預備耕田河外有老苗曰此蝦蟆精也若至三月來是其出洞時難與敵也今春未溫尚易制耳乃令以狗蝎血及污穢物着槍中出與戰彈果穿身流民不支遂大奔潰正月二十二日敵追至通巖堡洪倫出寨門督戰身着數彈乃以手塵揮曰我不管我不管二十年後長沙龍華會上再為相會言畢即沒各男女奔回沿途截殺屍積如邱州人之死除失城失屯外此其巨也或曰國家不祥出此妖孽藉以



收生或曰聶志大而才殊篤信其教故致覆亡然其結團體保流亡糾合同類志在復仇甚足嘉也兵潰衆亡蓋有天焉其忠義之行不可以不表也又有曰聶在重陽坪作醮時身披鶴氅作姜尚父裝扮手持魚網以網男女得網者謂之得渡心頗喜之後兵潰時其不死者皆未入網者也又曰洪倫作一竹鷄日夜拜之至於生毛又拜一燈息而復明此暗中易之借以惑人無足異者惟賞善罰惡公而不私乘其時會聚衆至六七萬行列不亂聽其驅使雖季漢之張陵張魯無以過也當時黜中官吏苟利而用之嚴其步伐帥其行伍借以平苗何致有十九年之亂此中蓋亦有天數存也按當採訪聶事時承棟擬為之立義民傳此論一出多有是

黃平縣志

卷十五 忠義

六十四

之及編纂時局中同事菊圃雨村兩分纂多是承棟之論不宜如他志竟謂之為盜惟曉卿兄大非難之以為妖人聚衆不軌死我縣人實為恨事各持一端竊謂事有反對理乃益明因請著論反對外並著論以評之曰金人之亂南宋流遷河北之民羣起抗金如宗澤李綱岳武穆諸賢均請召致義民豪傑以復中原故魏勝起兵宿遷王友直起兵高平以宋民而保宋地綱目乃大書而特書之若有予能復我疆域以攻異己之亂我神州虐我人民者今如洪倫所為不稱尊號不戕官奪城一可嘉也糾合同類志在復仇二可嘉也其率衆也男女之界最嚴賞罰之令甚明三可嘉也得地不為己有生死與衆共同四可嘉也引誘叛苗一鼓殲之五可嘉也

他如借神權作齋醮特狐鳴篝火聚雲夜哭用以籠絡士民如陳勝張耳如漢高光武莫不以此糾合眾人古之太史猶為之作世家作本紀豈得盡以妖人目之耶且時至今日君權輕而民權重四野干戈萬國環伺在在講求保族保種皆需共出誼力結合團體以與加刃於我之仇讐抗他書不查猥以盜寇目之如此淺見寡聞不惟不知今日大小團體大小社會之義即三代上之游牧部落之史亦不知之徒以成敗論事小節繩人豈不慎乎嘗考韓文之原道篇曰行而宜之之謂義朱子註曰義者事之宜也又乾之文言利物足以合義聶洪倫當全國離亂之時崛起草澤糾合如許人民為之保種族平寇變其利物為何如其行而宜之又何如昔者

黃平縣志

卷十五 忠義

六五

太史公為游俠立傳不過急人之急已也如聶洪倫者號召六七萬眾響應數十百里而目的專在於平寇安民其急人之急又豈游俠之可比耶所惜者智不及以用武遂一蹶而莫起然而山野村氓目不識丁何知用文行兵之道故不能成一成一旅之功今獨高其保衛流民為我華族樹一義旗因採輯而補前志之所不及如 高明有論請並列而陳之以俟後賢判評

按黔中教匪有黃號白號等名其派別為唐郎保智化於是有志公化公諸教會起聞之前人某教保唐保宋某教扶清扶元五家似各寓有革命之意以此互相攻伐姜公所為雖近於是跡其心術行事又若不合即隊下有白將軍石馬元

帥諸名乃敗潰後各自分途標號姜公當日並未有此僭也  
黃光泰號開陽州武庠住北四區螺螄壩光泰為人剛愎任事  
曾在鄉辦團衆依賴之區東北之構皮灘為袁家渡下流渡  
甚為難乃倡首捐銀置田五十餘挑及土場等用之供給渡  
夫以為義渡刊碑在岸路遠未得人抄又光泰有表姪周子  
林閔國鈞者閔之父甚樸厚鄉人欺之光泰多方扶持周甚  
流浪光泰教之不得在甕安地將田喪盡乃移周至家並其  
母亦來俱贍養之又胞姪某共處一家光泰置田千挑兩姪  
垂涎求分不得因訟於官依法應判一半與姪大拂保全  
兩姪之意居甚懊惱

喻朝福號和卿北四區之甕脚場人現年七十有五生平厚

### 黃平縣志

#### 卷十五 忠義

六十六

子忠貴充當團甲與人排解事故多不決朝福力決之鄉人  
頌之不置忠貴富甲一鄉人謂朝福之厚所蔭

聶松雲號長青湖南鎮算道人以手藝至北四區喜立名能任  
事區內人民重之舉為區長並辦團防局事勤於緝匪某鄉  
有警人正患之無何兵勇馳至視之則聶區長來也與蕭元  
興余化龍劉榮開等集資鑿開袁家渡河之老虎口等險灘  
並修檢緯路塔口河下得以行船區內米穀因之行銷此後  
四區日有起色均聶等力也

梁家渡為去龍家壩鳳泉縣等之要道渡為梁姓私渡過客每  
被刁難光緒丙午年余化龍庠生與蕭元興熊光印石光明  
等捐銀七十四兩將其渡口之田業基址買作義渡梁姓服

其高義因大減價又有北四區內朝陽寺住持王金河亦提出寺田二十餘挑餘慶縣人梁書亭施田土地基一組年收租銀五六兩俱作每年渡夫之用各縣具稟立案永為官渡六人之力及賣渡梁姓之義均難泯也

又大蓬渡亦為北四區去江外之要道渡為吳姓私渡民國六年聶松榮將三星場復開移趕舊地渡在場下聶因勸吳青雲吳炳揚吳漢清吳榮江等將田業山土捐作義渡吳氏允之有餘慶縣人名戴榮昌並出銀二十兩買入劉姓田穀二十挑用以補助渡夫云

張文魁號子高前清例貢北四區高南人相貌魁梧性情樸茂在鄉辦團三十四年頗有聲譽

### 黃平縣志

卷十五 忠義

六十七

石中富北四區乾溪壩人光緒初年在地方辦團頗有聲名人多重之前州牧瞿子濬書賜忠直可風四字子二長明鈞州庠生孫八中富民國元年故時年七十有七

黃太興北西區太陽堡人未亂時在堡內辦團甚有勤能及亂後仍帶團保衛地方肅清後多知地方事州主依之北四區之糧多由黃與張文魁手清釐之

石顯明號德三舊城人州庠生石襄臣司空之族孫也讀書知大義當局紳堅忍任事為仇家誣於道署被罰金千元光緒末年舊城星山書院苦無書籍上海書局預約券出石慨然捐洋二百元為買圖書集成一部後無運脚石又捐銀百兩運至舊城今高小學校內書籍盈櫥士人讀之無不感石之

義云

楊日陞州庠生舊城人光緒十年病篤時以乏嗣故遺言將本  
己寨埧田一百餘挑捐作學塾亡後族內出爭得彭漢章茂  
材力質訴訟至府復下州經瞿州牧判結作啟秀義塾學費  
後設學校乃改作高小校內經費邑人德之並德彭之維持  
指導事詳學行傳彭漢章內

沈耀廷名光□南區重興人以字行年七十餘辦團多年每事  
顧全大局堅忍耐勞不避險阻縣城自肅清來如戊戌九月  
楊洪章之亂庚子九月凱里之失禍及州地又如辛亥臘月  
羅逆之變沈均與城內聯合通氣及賊衰禽斬餘孽清理逆  
產沈皆盡力羅逆亂後有數逆苗借奉教為名官紳恐惹事

黃平縣志

卷十五 忠義

六十八

端姑縱容之各逆脫命在鄉益橫沈大憤恨剉煙陸軍至其  
地沈乃禽而斬之於是惹起教堂得官紳為之力解乃免少  
年不知謂其多事殊激於義憤屢顧公益非借故生事人也  
今年已衰他年東南隅恐無人如此尚義也

孫之清事見學行

許秉章開州人同治末年來城貿易開萬合號漸有田業遂家  
之晚年來積穀頗多因以作慈善事直隸人數千在雲南法  
國所修鐵路作工路由城回貧無資許均一一補助城內外  
路多出金修之每年除夕必集米若干石錢若干千以濟貧  
乏行乞十年民國五六年病沒長子泰亨猶繼父志每年至  
期如數施送次子泰安占籍入州庠

王壽昌號鶴齋指揮王姚保裔王永昌之堂弟也學將成以貧並病足入州曹作掾十餘年無事原配黃氏織履以助壽昌守窮不為人作訟詞及他教唆事後收各櫃糧得餘資家稍裕凡道路貧困地方橋梁醫葯施棺救急諸善事無不量力為之親友有訴訟事多方排解甚有設席請紳耆老幼為之息者年三十習遊冥術有求以問吉凶者嘗借因果神鬼事勸戒鄉愚暇則手執一卷五經三傳及易知錄皆能上口敬禮士人有學行者尤重之經史事實忘之者問之多能答覆晚年多病尤好善城南五里墩根木哨火災俱捐資賑助將沒時猶獨力修文波寺後石橋一座今年春正月卒人多惜之

黃平縣志

卷十五 忠義

六十九

羅澤鍾號崧皋其先世閩之延平沙州人也及始祖諱子功者入州宦居於興隆衛至某世祖始移住於舊州西鄉羅祖某父某羅生天資英邁為學日記萬言年十四五棄學遠買及州城陷寄居於省垣時因避亂赤貧若洗羅操守自如不忤不求日售筆墨為炊羅之孺人林紡織以助羅葛巾布袍意適然也光緒初亂少平羅以筆札陡致萬金縮衣節食一如平時某官宦乏無力引見羅傾囊以助戚友中事有無資舉者與商之必解囊予後某官及各戚貧負所助而羅因解推豪用亦窘盡取負券焚之家人憇之曰天地生財原予人以流通夫人之負我非人之本心也貧也貧而執券如無也假使夫人而富我無券而求償人亦肯昧天良也耶但我貧時

如何富又如何今而貧而富富而貧也又如何我何礙礙焉  
如市井僮父為也生平於貧富二字不獨於己相忘而人之  
若貧若富者亦不知有貧富在其人焉戚友往來惟知有勸  
戒焉而已有周恤焉而已有求焉盡力而已有謀焉盡心而  
已後進子弟尤喜獎勵學有不知問焉必言親族婚喪貧而  
過奢富而過儉者立正之損益當理故往來者於直而畏其  
嚴於施予而喜其慷慨於言語而愛其和平於謀慮而服其  
明於勸勉獎勵而欽其訓誨此同宗異姓所由共相敬仰者  
也某年月作幕某軍營以績得選用府經歷丁酉春卒例贈  
修職郎

黃品俊號曉筠縣南重安江人本小康家子六歲受書能解義

### 黃平縣志

卷十五 忠義

七十

昔遭咸豐乙卯之亂流離失所時俊年十四歲隨表叔李少  
穆入湘軍營司筆札獲保五品藍翎以縣丞用同治初由蜀  
回黔復入武字先鋒左營幕亂平叙功僅得同知銜以知縣  
銓選無內援故也遂淡於名而理生人業先人遺產讓諸弟  
食乃謀為蕃署掾由苦而甘光緒己丑恭逢覃恩為先人請  
五品封典生平仗義疎財凡族戚婚嫁喪葬無力者咸助之  
宗廟初建捐重資並一切神主燈彩祭器等物他如廟宇橋  
梁道路及掩骼埋瘞施藥放生諸善事無不樂為又以父星  
門封翁歿時遠在西蜀得舊友殷瑞泉代視含殮德之視同  
手足為之置屋授室殷現有子生孫矣至家庭中兄弟未嘗  
失和夫婦未嘗反目享年六十有四卒於重安故宅子三長

培開庠生

張義源城西老王屯人生平好義樂施與承平時固樂善不倦及咸豐避難於外見族戚困乏者輒散財分給每日當此亂世擁資實禍患也與其飽諸賊苗何如濟我同胞肅清歸家不中資而樂善好施如故子振宗入邑庠積厚流光此特發軔也

許子益號利齋南區重安江人監生性醇厚好施濟如施衣施藥施棺以及修橋補路各善舉十數年如一日每歲臘月囑家儲米至除夕施濟貧乏鄰邑貧者亦沾惠焉最可風者許配程氏姪永清歿於湘遺孤僅二歲許以白金二百兩遺程撫孤經前鎮遠府憲全旌其門曰好義可風現年七十有六

黃平縣志

卷十五 忠義

七十一

猶善飯健步子二琨宗宗堯均邑庠琨宗亦尚慈善頗有父風

許模號克誠南區重安江人庠生性和藹見義勇為對於修建橋梁廟宇道路平糶諸義舉無不捐資提倡見人疾病與貧而無葬者給予藥餌棺木每歲除夕施米濟貧鄰邑貧者亦來領取近今變賣官營產重安汛西門外操場一幅不惜重資購作義地鄉里賢之

沈之燧號燦星庠生弟武庠之煥號燦章南區重安江人兄之炘光緒壬寅年買於粵染時疫卒時孀母年邁戒家人不以聞逢七化包必夜闌人靜即近鄰亦鮮知者其於地方橋梁廟宇路道平糶諸公益有所興舉樂捐重資以為之倡間亦



獨任其事者如重之旋水灣為旁海灣水及四鄉趁墟要道時有坍塌隨崩隨砌行人便之其他施藥施棺無善不為重安時有火災之煥墊資由漢陽購水龍水槍後之火警賴之救滅又倡捐重資購對江塘官地以作義塚其除夕施米亦與許同遠近稱道不置

譚宗奎號子成南區雙鳳嶺人監生勇敢尚義咸豐之亂由行伍投入趙營以功保至都閩承平歸復納粟入監辦團數十年維持桑梓人皆仰賴生平喜作善事如修湖南會館鉄練橋大路並宗祠等類皆捐地捐金毫不吝惜鉄練橋成旁修刹廟以鎮橋頭災於火神像無損獨力修復費不貲即守劉公漣焞兩過此橋賜匾曰種慧禪林聯曰火宅忽迴身想法雨慈雲救得羣生無量苦鉄橋重到眼聽朝鐘暮鼓不須再畫辟支禪皆紀實也

### 黃平縣志

卷十五

忠義

七十二

王光燦號子清城南黃猴鋪人武職家殷實性溫良尚義父人龍早逝賴母張氏撫育年十二值苗叛母携逃於清平之香爐山賊猝至母給燦隨眾先行遂墜巖死燦聞號泣返尋為戚鄰迫上路乃得免稍長投筆從戎隨某都閩勦匪至陝周某者提督也重燦貌賢為婿黔亂平燦欲偕婦歸而難於言婦賢以從夫之義告父母遂偕歸水土不宜病故燦乃續娶羅余二氏痛母全節殉難屍骸莫掩故力行喜事以報劬勞羅余二氏賢多所贊助除建宗祠捐祭田外如廟宇橋梁道路皆首捐重資倡又獨修石拱橋一石平橋二皆在五里墩

坎下又修五里墩分路處起至瓦廠坡石路十餘里捐玉皇閣天燈田城隍廟善化寺香燈田各一份他如刻善書施藥丸皆所樂為至辦該處團務排難解紛勸人息訟為一方保障歿於光緒癸卯年享壽六十有一繼姪孫鍾盛承嗣女四長適黃幼適楊次三長齋繡佛守貞不字

孫德元號建堂舊城人生於道光癸巳年少孤母下堂去年十八娶妻即迎母歸養生平喜讀醫書又常請教高明以故岐黃日精受人延未嘗索謝貧者反以藥資與之母病乳漬腐不堪日進藥至以口吮其膿三年始愈及其逝也哀葬如禮其修宗祠財力兼盡又喜培修道路橋樑如北門百子橋建時適當暑月孫為監修日在驕陽中落成乃已後以醫道傳

### 黃平縣志

卷十五 忠義

七十三

子炳章民國乙卯年無疾而終享壽八十有三子二次殤長即炳章孫履端現充鄂西靖國軍黎師長天才部下二等執事官

楊朝邦老虎坳人生於道光丁亥年二十三歲娶妻潘氏越二  
年生子德芳彌月後潘氏病故朝邦以潘因產而亡誓不再  
娶日抱德芳從鄰婦乞乳撫成邑人曹秀山者官黃施衛與  
朝邦友好勸之娶不從歷五十餘年德芳先死朝邦至民國  
辛亥年享壽八十五歲而終人以義夫稱之現有孫遇春等  
四人

張九保甕谷隴苗族也為劉子箴外祖家佃戶乙卯之叛子箴  
父履和母某氏携子箴逃於新城履和遇害母子失散遇九

保黑夜送少主人出險回知子箴為主人外孫救匿山中越  
二日送至平寨之銅鼓塘方與其母相會如九保者雖夷人  
亦義俠之流也

裴成亮南區重安江人雁行四成亮居二知識優於諸兄弟咸  
豐亂起逃居於湖南沅州等處一家二十餘口皆仰給於成  
亮成亮亦無私財行商於粵鄂間首先提倡建江西會館三  
建三災成亮多方籌畫始得規復舊日壯觀又見義勇為或  
力不足勸人為之人有紛爭柔聲善勸從不聳人與訟成亮  
固不訟人人亦未嘗訟成亮故自壯至老未嘗一履公門每  
月朔望必禮帽禮服捧香燭敬茶至各廟敬神人或迂之而  
成亮履行愈恭年七十餘卒

黃平縣志

卷十五 忠義

七十四

王永昌號壽春縣城人父母早逝學而未成為州署戶曹掾無  
惡習勤儉根諸天性循良與生俱來家僅中人產而施濟勝  
於富豪凡橋梁道路廟宇疾病以及掩骼埋胔培塚施衣施  
棺施藥諸善事或獨任或提倡知無不為如甕口石橋城北  
頭道河石橋均倡捐修造人有涉訟者或具杯酒或墊薄資  
總以解和為樂又憫獄囚罪繫每蒲年二節備角黍糯食稟  
官俵散習以為常其仁愛類此尤多子三長倬慈愛不減父  
風次殤三佐南明中學並測量學校畢業現任陸軍司令部  
測繪長

魏璽傳號爾玉重安人古直樸茂敦本務農平居躬行孝友為  
宗黨子弟表率光緒初年苗亂肅清修復江西會館爾玉率

其族人富者捐資貧者助工襄成盛舉妻周氏存心慈善凡建修廟宇周濟困窮時出資以佐爾玉竭力為之數十年不倦夫婦齊眉卒年各八十餘歲子孫世守耕讀不墜家風韓邦森即韓森記江蘇人商於舊城遂家焉為人豪爽尚義對於地方公益知無不為為無不精如舊城聖宮之道德坊架木為之是其手建迄今不偏不倚亦無朽壞又新州之考棚書院材木均由舊州運來運費耗大邦森率木工量其寬窄度其高低用立木若干穿坊地脚若干或長或短宜厚宜薄規畫清楚由舊城裁減斧鑿齊全權其輕重包力抬運費省而速如期建立工堅料固為兩城各衙署及文武各廟冠今改為兩等學校一壁不壞紳耆義之允其子孫世占州籍以

黃平縣志

卷十五

忠義

七十五

籌庸也於今人亡久矣其生平應事精細急公好義為兩城人士永懷不忘也

張宗銓事見學行

楊卓新字偉堂上塘兩岔河人生平正直樂善好施見義勇為凡地方橋路廟宇視己之力能為者無不提倡贊助初造修補務期落成享壽八十四而卒真一鄉之碩望也

宋士豪字幹臣東坡人公正不阿取與不苟光緒初効力綠營保六品軍功後辦東坡團保衛桑梓排解是非一方仰賴辛亥逆抗羅應榜等謀叛十二月十九日焚陷州城新軍解隊官得升奉令北伐道宿城中率兵擊退後次日馳去過東坡幹臣挽留返救不許至伏地哭泣解為感動反縛救援殺退

諸逆城不再陷保全身命財產無數亂平蒙唐督獎五品軍  
功地方官紳旌以匾額現年七十餘歲辭職家居常以忠義  
勉勵子孫

楊榮春楊再先楊再玉楊再朝均東區山凱人雖苗族而本漢  
籍明理好義不隨苗叛同治庚午有漢族男女八百八十餘  
口避居紅巖堡嗣席軍進剿至州駐紮逆苗同議殺絕漢人  
無使漏網榮春等聞知不忍連夜報告席公救援願作鄉導  
席查其誠發兵往援八百餘人皆得出險迄今感榮春等忠  
義不忘

楊秀元即再先再朝之父道光丙午有乞丐至鄉乞食秀元視  
其不類乞人詢之乃施東濫泥溝寒士曹某因覓館不就流

黃平縣志

卷十五 忠義

七十六

落無歸秀元乃挽留至家為易衣履命子姪從讀後革夷台  
拱知名爭聘修金至百餘兩之多曹感不已

楊考勞考松東區新莊人家小康喜任恤每年五六月米貴時  
開倉糶穀不取孤貧利息咸豐之叛深懼順逆不分同罹法  
網乃投州署哀祈護照而逃

許文奎字鰲峯城西老王屯人乙卯之亂常募團兵禦賊賊頗  
憚之城破時許左足病疔卧床在家家人俱散聞呼譟聲始  
起於門隅得一杖扶以出不數武病若失因沿門探望各親  
族均逸去至族叔母張氏門聞太息聲入視則張以八十餘  
姥為家人棄也許負而逃張不肯行許負益疾至城缺縋下  
晝夜奔至舊城行荆棘中頭面手足俱刺傷親友見之勸棄

置許曰吾從虎穴中負叔母出今安可舍也於是携抵首垣  
妙手空空加以柴桂米珠許奉之如已親越數年病卒並厚  
葬之遠近稱其義許為人慷慨好義不阿世有餘資常以濟  
貧桀驁輩雖勢倣赫然斥之不懼也同治丙寅年卒於首內  
光緒二十年以長孫蔭宗貴賜封奉政大夫宣統元年次孫  
義宗為兵馬司指揮請封晉中憲大夫

李華榮城東茅草平人與兄正興比屋而居宣統元年某日夜  
竊盜入其家竊猪去弟兄同起各執一矛截盜於途而殺之  
天明鄰右集視兄弟各稱為已所殺鄉人以命件為大案往  
報於官州牧某親往勘驗華榮弟兄執前詞不知誰為事主  
問諸鄰舍亦莫決只得置華榮於獄城紳義之乃爭於牧曰

### 黃平縣志

#### 卷十五 忠義

七十七

盜入民屋獲而殺之不過事僅盜竊施過當耳至弟兄各稱  
已殺爭置於獄頗有北海弟兄風牧上其事未幾得釋華榮  
在獄時其妻往視禁卒義之暗藏妻於獄朝夜服役及華榮  
出妻舉一子人謂孝友之報辦事員紳更舉為毅字團首每  
事直前不避艱險鄉人賴之民國十年病沒於家正興繼理  
團務正興勇為雖遜於弟然極樸茂耕稼之餘行巫教於里  
閭多敬愛之

許子咸號澤山文奎子也本與老王屯張氏同祖後多住於重  
安又稱重安許氏年十四值乙卯之亂隨父文奎轉徙兵燹  
間亂平寄居省城為小負販辛苦十餘年資稍裕設市於首  
垣凡與交易取予分明遠近稱之故商業日盛嘗謂曰生不

逢時未能拾青紫以光族里碌碌可恥於是砥行礪節商事之餘並究聖賢經傳及百家書士夫敬之晚年尤好慈善事歲費巨金作周濟事如省內施粥廠平糶局均出金補助又如省中名勝坍塌朽壞悉為修治光緒丙申歲荐饑嵩中丞設局平糶以子咸為協理自朝至暮枵腹無倦郡守揚於嵩復委南保局紳過人民爭訟得一言即解子咸性嚴重子弟就外傳夜必課讀嘗深宵不寢子弟亦不敢寢避難時姊適重安陸氏未知所終母周氏念甚篤乃探訊至楚之洪江悉姊新寡即迎歸養之為請旌表姊女適唐光禕孝廉賙奩皆為所備二十餘年姊卒為置墓田祀之子咸又有傲弟子升每竊資賭置不問子升徹夜不歸必達旦以待子升與人角

黃平縣志

卷十五 忠義

七十八

嘗背負傷人至家為之醫愈並解囊息事蓋母愛子升恐計較以傷親心民國四年都督劉公聘充府參議每決大事為諸老成所倚重逾年卒停柩在家鄰人不戒於火燬已及數人舉柩出輕捷異常由此得免人謂忠厚所至子六長蔭宗思南府訓導次義宗清北城兵馬司副指揮改大理寺評事三智宗日本宏文院及電氣專門學校畢業孫邦靖今第二區省視學有聲於時

黃德昌號玉堂根木哨人避乙卯亂寄居省城讀書不多而明大義當離亂時奉父母奔逃間僱夫不及則力負以行率二弟克昌經商以供菽水亂平以諸弟失學為恨使克昌歸應小試入武庫為仁昌捐同知銜後子姪請五品封貤贈祖父

已亦如之皆能繼商業家居樂為善喜施予如重修外黑神  
及他廟宇皆捐鉅資並董其事落成而後已府縣以其公正  
委辦公益與人排難解紛咸稱平允現年八十餘歲子孫蕃  
衍

韓祖光字惠廷州庠生也入庠後與今恩貢生注冊直州判聞  
人傑充當齋長清理苗亂後之遺失公田承辦祭祀興復兩  
城書院之官正堂課極有勤能時瞿州牧再履州任振飭庠  
序總理者為張政張蘭皋而奔走任勞者則為祖光與聞人  
傑也戊戌苗亂許武經殺斃洋人於重安仇家誣陷祖光與  
許庠生某得洋人物務置之法得全楨績按察使力持之僅  
革衣頂祖光由是不樂解業為商壬寅秋販煙往粵被匪攔

黃平縣志

卷十五 忠義

七十九

刳沒於梅寨司之朗炮河中

常樹勳號績臣州茂才也家貧力學光緒己丑歲試同承棟為  
陳筱圃取入因居舊城故舊城前輩舉充星山書院齋長時  
書院未有膏火得瞿州牧清提饗儀賓與其盈餘為堂正  
課獎資樹勳與孫士琨等經理星山書院與聞人傑韓祖光  
之經理龍淵書院均能盡力樹勳性尤篤厚誠實無欺兩城  
人士甚重之惟嗜酒飲不輟晚年不改故四十餘而卒子文  
炯中學畢業明敏過於其父

鄧光榮號植之北三區平溪壩人也鄧於平溪為大族富甲於  
州州人呼落巖鄧家又曰鄧十萬蓋言其穀之多也咸豐之  
亂鄧氏中落自肅清歸來其叔廷傑已起家而光榮年尚幼



至光緒壬辰年考入武庠力為經營得妻某氏勤以持家凡  
養猪磨礱事無不自為之故未十年亦富至萬金為叔廷傑  
之亞然光榮富不及叔而好義過之族戚友朋之有急需者  
呼之無不量力以助性且坦易與人交不立城府民國以來  
地方多故官長委充區長光榮自養團兵十名槍支子彈均  
自為之助以地方之兵區左右有匪聞警即率兵以往獲賊  
甚夥一方恃為保障民國九年夏劫匪過清池光榮率兵截  
之獲贓及匪解縣訊辦後數月隻身出匪出不意羣追之幾  
至不免至秋病卒後之辦團者少如光榮之慷慨出資故今  
令人思念不置子五長已二十餘歲歲收二千餘石穀今夏  
饑聞其家猶乏食可以知其輕財矣

黃平縣志

卷十五 忠義

十

彭澤章黃平人性至孝事母楊氏極其誠順年五十不離母側  
常侍湯藥母八十卒哀喪不食者數日衰服終身二弟海章  
三弟漢章黃平武庠兄弟友愛終世無間言性又慈善茹長  
齋戒殺生佛一軸香一爐手持菩提口誦貝葉靜室默坐不  
妄一語勸人以善先言以孝鄉黨稱之善人民國元年苗逆  
羅應榜叛臘月十九日夜城陷澤章率諸姑弟姪奔至北門  
城門初啟難民爭出澤章手持城門竭力扶抵兩面城墻斯  
時城中火燄煌煌炮聲隆隆弟姪等促其速行隨聲應曰前  
乙卯年城陷門閉人死街中枕藉豈忘老母之言乎竟不顧  
一家之存亡遂將城門張開難民奔出隨與諸弟姪輩出走  
避免一家安全無恙豈善心感動上蒼而然耶澤章卒年六

十有六葬日猶有鄉鄰至墳哭泣者可見平時為人乏好善也特附諸卷末以彰其善

補

趙學堯號明齋衡州衡山縣人父星勝副將總兵銜帶果毅營某營來黔死亡學堯幼孤母撫成立童試不售因隨岳父陳長明至鎮遠以軍功署重安外委旋補存城外委勤慎奉職十年無異裁缺後家於城置有薄田屢充北區區長及團防局收支庶務等職處事恪謹忍辱耐勞十餘年無過犯如往東鄉安慰羅犵及招降田忠國等事人多畏難且慮後患學堯毫無顧忌挺身直往紳耆賴之現年五十猶在地方任各繁務

黃平縣志

卷十五 忠義

八十一

萬炳榮號北廷銅仁府人由綠營當差得補重安外委光緒之末到任奉職甚謹反正後家於重安辦理地方團務忍辱耐勞不異學堯紳耆賴之清稱千把以下官為總爺言及辦公勤慎莫不曰重安萬總存城趙總實為難得之士